

Nai' Paulus in surat ahunut neu apirsait ein et kota Korintus 1 Korintus

Saloom

¹ Surat re' ia na'ko au, nai' Paulus kau, tua. Uisneno npiir inrair kau he 'jair Yesus Kristus In haef. Ma nai' Sostenes nsonu' haan tabes ma haan buseet neu ki msa'. ² Au 'tui ma 'sonu' surat re' ia 'eu ki, es re' Uisneno In atoin apirsait ein abitan kota Korintus. In npiir naan ki he mjair In tuaf akniun' ein, natuin hi mpirsai mrair Yesus Kristus. In nakninu' ki on re' In nakninu' apirsait ein ok-oke' et mee-mee jah amsa'. Fin sin ntotin turun-babat na'ko hit Usi' Yesus Kristus amsa', re' Uisneno nba'an nain na'ko unu' he nreek Ee neem. Rarit In njair hit Usi', ma In njair sin Uis amsa'.[☆]

³ Au 'onen 'eu hit Ama' Uisneno, ma hit Usi' Yesus Kristus. Au 'toit he Sin naruru' ma nakrira' Sin nekak arekot neu ki, maut he hi bisa mmoin nok mamut, rame' es nok es, ma tainina'.

Nai' Paulus antoit sukuur, natuin atoin Korintus sin

⁴ Ansuun oras au umnau ki, au u'uab 'ok au Usi' m'ak, "Makasi kou'-ko'u natuin atoin Korintus sin rais pirsait!" Fin Uisneno naruru' ma nakrira' In nekan arekot neu ki, natuin hi mpirsai piut meu Yesus Kristus, re' In nreek

[☆] **1:2** Haef ein sin Reta' 18:1, Nai' Joel 2:32

Ee neem. ⁵ Rarit In nfee ki 'be'if ma ma'tanif he minaob mepu ma re'ot huma'-huma', natuin hi mmafuut mok Ne. Naan anmoe' ki mjair atoin amu'it ambi hi neekm ein. Es naan ate, hi mihiin batuur-batuur rasin re' pentiing anneis anmatoom nok In raan a'honis. Hi mihiin ranan mee es re' reko nneis he mitoon amsa' meu tuaf anmatoom nok Kristus. ⁶ Rasin naan ok-oke' naruru' ma nakrira' mnak, rasin re' hai mitoon sin meu ki nmatoom nok Kristus, naan na'uu ma na'baa' ma'tani' nrair et hi neekm ein. Etun hi mpirsai ma hi neekm ein na'ki'in fe', mak rasin re' naan ro batuur. ⁷ Onaim hi mtoupu mrair are' rais arekot sin re' Uisneno In Asmanan anbatin nfee neu lin na. Ka nabait fa saa' es a'kre'o msa'. Rarit hi mpa-pao neno naan, re' of Uisneno nfei je he naruru' ma nakrira' hit Usi' Yesus Kristus, neu mansian ii ok-oke'. ⁸ Kristus naan, es re' anha'tain ki he hi maran ma mtahan piut tar antea In nkoen On anfain neem anbi pah-pinan ia. Nok ranan naan, hi ka mmouf fa, ma ka nmui' fa tuaf re' bisa nait ma nasaeb sanat neu ki. ⁹ Hit bisa tpirsai Uisneno In Kabin ma Prenat, fin saa' re' In na'uab ee naan, In nmoe' je te, njair. Rarit ro tebes In of anmoe' rasin re' ia neu ki. Fin In es re' anfei ranan he hi bisa mihiin mirek-reko' In Anah, es re' hit Usi' Yesus Kristus.

Jema'at ki arki ro he mjair mese', kais ampee' ma msisaekn om

¹⁰ Aok-bian manekat arki! Anbi rasi ia, au u'uab 'eik hit Usi' Yesus Kristus In kanan. Onaim au 'toit batuur-batuur he hi misnasab matoes nai. Mes am'usaha he mmoin nekaf mese', ma kais ampee' ma msisaekn om. Hi

ro he mitenab mirek-reko' ma namnuut mibubua, maut he hi mihiin mak, hi mpooh ma mnaa' sarit mese'.

¹¹ Fin anmui' tuaf na'ko bi Kloe in uim je nanan re' neem natoon kau mnak, na'ko hi arki, bian anmatoen piut. ¹² Au sairt ii on nai: hi bian mak, "Au re' ia, nai' Paulus iin na!" Bian nak, "Au re' ia, nai' Apolos in tuaf ein na." Ma nmui' bian antein anmaktoon ein am nak, "Au re' ia, utuin aam Pe'u!"* Bian antein nak, "Au re' ia, a'neen ma utniin 'eu Kristus anmees jah!"*

¹³ Hi teenb ein, on mee? Kristus In nonot-asar ka bisa nbaitis ok fa. Ai' hi mitenab am mak, au es re' amates a'bi hau nehe 'eu ki? Kaah fa, joo! Ai', oras sin nasrain ki npaek au kanak he nataam ki mjair au ngguin? Ka on fa naan, tua! ¹⁴ Au 'toit makasi 'eu Uisneno, fin oras au 'bi naan 'ok ki, au ka usrain fa tuaf. Suma au usrani haa nai' Krispus ma nai' Gayus.* ¹⁵ Nok ranan naan, ka nmui' fa tuaf nak, "Sin nasrain kau npaek nai' Paulus in kanan, rarit au 'jair nai' Paulus iin na." ¹⁶ (Au fe' umnau. Au usrain tuaf bian a'bi nai' Stefanus in umi msa'. Mes au ka umnau fa karu nmui' tuaf bian antein re' au usrain, ai' kaah.)*

¹⁷ Fin Kristus ka nreek haefan kau fa he 'nao usrain tuaf. Au mepu re' he u'teesn ee ji, es re' 'nao utoon Uisneno In Rais Reko. Mes karu au utoon tuaf on naan, In ka nroim fa he u'uab 'eik mahinif, he ururu' ma ukriir ahaa 'eik uab

* **1:12** Suur Akninu' uab Yunani ntui' mnak, "Kefas". Kefas naan, nai' Petrus in kanan es antein. ✧ **1:12** Haef ein sin Reta' 18:24 ✧ **1:14** Haef ein sin Reta' 18:8, 19:29, Roma 16:23 ✧ **1:16** 1 Korintus 16:15

hinef ma manoef. Fin karu au u'uab on naan, naan nabait kuasa na'ko reta' re' anmatoom nok Kristus In a'maten anbi hau nehe.

Kristus antoup In kuasa na'ko Uisneno

¹⁸ Anmui' tuaf natenab nak, are' kanan rasin re' hit tareta' sin anmatoom nok Kristus In a'maten anbi hau nehe naan, mono 'maten. Mes tuaf human on re' naan, of anbait on na'ko Uisneno. Te kaah, neu kit, Kristus In a'maten naan naruru' ma nakrira' Uisneno In kuasa he nsoi nafetin kit na'ko hit sanat ma penu sin. ¹⁹ Naan on re' Uisneno In mafefa kninu' nai' Yesaya ntui niit am nak,

“Uisneno nak,

'Are' kanan rasi re' ahiint ein nahiin sin,

Au of a'pukai ma 'sisa'en 'ain sin,

he njair rasi re' ka ma'osa' fa.

Sin mahiink ein nahuumb on, on mee-mee msa',

Au of 'ait i'porin 'ain sin,

he njair rasi re' ka mapake' fa.'”✧

²⁰ Unu' te, Uisneno ro tebes na'uab on re' naan. Rarit oras ia, anjair on mee? Ahiint ein, anjarin on mee? Tunggur agaam ein, anjarin on mee? Ma re' tuaf re' na'siti' nahiin rasi ma niis, anjarin on mee? Amneen miit! Uisneno nmoe' sin on re' amonot! In nfaki nrair tenab ma ronef re' na'uu ma na'baa' anbi pah-pinan ia, ma nmoe' sin he ka ma'osa' fa saa'-saa'.✧

²¹⁻²² Uisneno In mahinin, ma'tain re'uf. Maski mansian ii naan in tuan ee ahinit, mes sin tenab ma roenk ein kuuk ka nanokab fa he sin bisa nahiin batuur Uisneno. Maski on naan amsa', mes Uisneno anpaek In mahinin he nfei

✧ **1:19** Nai' Yesaya 29:14 ✧ **1:20** Nai' Ayup 12:17, Nai' Yesaya 19:12, 33:18, 44:25

ranan neu mansian. Fin unu' te, In natenab am nak, "Maski mansian ii nak Au haef ein amoont ein, mes on mee-on mee msa', Au ro he 'reek haefan tuaf he nnao natonan sin rasi re' batuur anmatoom nok Kau." Fin Uisneno nafeek anrair he npaek haan beno re' In haef ein neik je naan, he tuaf bisa npirsai Je. In he npaek ranan naan he nsoi nafetin tuaf na'ko sin sanat ma penu sin.

Mes mansian ii naan Uisneno In ranan naan nak, mono. Etun sin ka nromin fa he ntoe natuin Uisneno In haef ein. Fin atoin Yahudis sin suma ntoitn ahaa rais sanmakat huma'-huma', he sin bisa nkius Uisneno In kuasa. Ma atoin Yunanis sin suma nromin he nnenan kuuk rais mahiin ein re' matopu' ma ntaam neu tenab ma ronef, natuin sin teenb ein kuuk. ²³ Maski on naan amsa', mes hai re' amjair Uisneno In haef ein, suma mnao he mitoon meu tuaf am mak, "Uisneno nreek anrair Kristus, es re' Tuaf re' In nba'an nain he nreek Ee neem. Rarit tuaf bian ankuus na'maet Je nbi hau nehe." Oras atoin Yahudis sin anneen reta' naan, sin he ntorak ma nporin rasi naan, fin natuin sin tenab, Tuaf re' Uisneno he nreek Ee neem, ka bisa nmaet fa on re' naan. Oras atoin Yunanis sin anneen reta' naan, sin nateenb ein am nak, "Reta' naan ro mono batuur-batuur!" ²⁴ Mes anmui' tuaf re' Uisneno npiir nain je he njair lin na. Bian sin na'kon atoin Yahudis, ma bian ka atoin Yahudis fa. Natuin sin re' naan, Kristus In a'maten naruru' ma nakrira' nrair sin am nak, Uisneno In kuasan kou' re'uf ma In mahinin, ma'tain re'uf. ²⁵ Maski mansian ii naan Uisneno In ranan naan nak, amonot, mes In nahini nneis na'ko sin. Ma maski sin natenab Uisneno ka nmui' fa kuasa saa'-saa',

mes In kuasa ko'u nneis na'ko sin.

²⁶ Aok-bian manekat arki! He hi bisa mihiin au uab re' ia, mimnau oras hi 'hakem ma hi 'naom, oras Uisneno npiir naan ki he mjair Iin na. Tatuin mansian ii in 'resit ma taiba', anbi hi tnaanm ein ka nmui' fa tuaf namfau re' nahiin, ka nmui' fa tuaf re' nmui' pengaru, ma ka nmui' fa tuaf amfaun na'ko nonot-asar re' makana'. ²⁷ Mes Uisneno npiir he npaek tuaf re' mansian ii naan ee amonot, he namaeba' tuaf re' naan in tuan ee ahinit. Ma In npiir he npaek tuaf amsa' re' mansian ii naan ee ka nmui' fa kuasa saa'-saa', he namaeba' tuaf re' naan in tuan ee nmui' kuasa. ²⁸ Rarit In npiir naan a'baut re' ka makana' fa, re' mansian ii nkana'paar sin. Fin Uisneno he npaek sin he nmoe' tuaf re' naan in tuan ee ma'tani', njair on re' ka ma'osa' ntein fa. ²⁹ Henati', oras atoni' anbaisenu n'ain Uisneno, ka nmui' fa tuaf es amsa' re' bisa npaas in a'basan nak, in re' naan, ro ma'tani'.

³⁰ Fin Uisneno nmees kuun es re' nfei ranan he hi bisa mtaam amjair Yesus Kristus Iin na. Uisneno es re' nmoe' Nai' Yesus anjair Tuaf re' nfee kit In mahinin. Nai' Yesus naan, es re' nmoe' kit bisa tmarama' tok Uisneno. Nai' Yesus naan, es re' nmoe' kit bisa tmoni kninu' ma tamnoon. Ma In es re' nsoi nafetin kit na'ko saant ii in kuasan. ³¹ Naan on re' matu'i nbi Uisneno In Suur Akninu' mnak,

“Sekau nroim he npures ma nbo'is,

reko nneis sin npures ma nbo'is hit Usi' In a'mo'en ma taos.

Kais naikas ma nanaib sin tuak ein kuuk!”✧

✧ **1:31** Nai' Yeremias 9:24

2

Hit ro he tatoon maat-maat teu are' kanan mansian anmatoom nok Usif Yesus In a'maten anbi hau nehe

¹ Aok-bian manekat arki! Unu' te, oras au 'uum 'eu ki, au 'fei ma utoon 'eu ki Uisneno In rais ma'nifa' re' unu' fe'e te, mansian ii ka nahiin je fa. Mes au ka 'eik fa uab ein naan he u'uab be'o. Ma au ka 'paek fa uab boo msa' he ururu' ma ukrira' au mahiin ki kuuk. ² Oras au ubua 'ok ki, au u'tenab on nai: au suma ururu' rasi mees' aah, es re' Yesus Kristus. In re' naan, Tuaf re' Uisneno nba'an nain Je na'ko unu' he nreek Ee neem. Mes oras Nai' Yesus anpoi ma nboor neem, mansian ii nkuus na'maet Je nbi hau nehe. Fin suma rasi naan ahaa, re' au uhiin je batuur.

³ Neno naan, oras au ubua 'ok ki, au 'naben ate, au ka ubei' fa, ma au umtau ma u'ta'i msa'.^{*} ⁴ Au uabak ma au haan beno naan, bisa tahiin je nok akninu'. Fin au ka 'paek fa uab re' bainesi' he 'furi' ki. Kaah fa, tua! Mes oras au u'uab naan, kninu' nrair neu tuaf nak, Uisneno In Asmaan Akninu' an'ator kau, ma In kuasa nbi kau msa'. ⁵ Fin au utenab, ka reko fa karu hi mpirsai Uisneno, natuin hi mneen ma mitniin mansian ii in uab mahiin ein ahaa. Reko nneis hi mpirsai Uisneno, natuin In naruru' ma nakrira' In kuasan neu ki.

Uisneno nanoni' kit anmatoom nok rais mahinif re' batuur

⁶ Te kaah, oras hit ta'uab tok tuaf re' in rais pirsait ee namnais jen, hit tanoni' tpaek uab ein re' ntaam neu tenab ma ronof. Mes

^{*} 2:3 Haef ein sin Reta' 18:9

ka ntaam fa neu teenb am ronef re' natuin mansian pah-piin ii in tenab, ai' natuin saa' re' anaa' apreent ein nanoni' sin oras ia. Fin noin' ein naan, of namnekun oke'. ⁷ Mes hai suma minoni' meu tuaf, rais mahinif re' nsaun neem na'kon Uisneno. Fin un-unu' te, oras pah-pinan ka njair fa fe', Uisneno na'nifa' rasin naan. Mes oras ia, In nafeek he nfei rais ma'niif ein naan neu kit, he hit tapein sapaaf anbi In pinan ma krahan. ⁸ Mes tuaf re' oras ia annaa' aprenat, sin ka nahiin fa Uisneno In mahinif re' batuur. Fin karu sin nahinin, ka neu fa he sin nkuus na'maet hit Usi' re' mapina'-makraha' nbi hau nehe.

⁹ Anbi Suur Akninu' Uisneno matu'i nma-toom nok Uisneno In rais ma'nifa' re' unu' te ma'koro' mnak,
 "Anmui' rasi re' mansian ii ka nkus niit ee fa fe' nok in matan fuan,
 ma nmui' rasi re' mansian ii ka nneen niit ee fa fe' nok in rugin,
 re' mansian ii ka bisa natenab naan ee fa.
 Te kaah, Uisneno nabarab ma naroitin nain rasin re' naan ok-oke',
 neu tuaf re' anneek Ee." ✧

¹⁰ Batuur unu' te, tuaf ka nahiin fa rasin naan, mes oras ia Uisneno npaek In Asmaan Akninu' he nfei rasin naan neu kit.

Uisneno In Asmaan Akninu' naan, nahiin nain are' kanan rasin re' naan. In anparikas tar namnuut amsa' Uisneno In nekan nanan.

¹¹ Hit es-es ate, atmui' kuuk asmanaf atbi hit nekak. Etun hit mansian ii tatenab ma tmoe' rasi huma'-huma', es-es ate nok iin ja. Ma ka tiit fa tuaf a'teta' re' nahiin batuur hit nekak nanan, suma hit asmaank aa kuuk. On naan

✧ 2:9 Nai' Yesaya 64:4

amsa' Uisneno. Ka tiit fa tuaf es amsa', re' nahiin Uisneno In nekan nanan. Suma In Asmaan aa kuun es re' nahiin Je batuur.

¹² Hit ttoupu trair Uisneno In Asmanan, ma In es re' an'ator kit. Etun hit ka tatuin fa mansian pah-pinan ia sin tenab. Natu in Uisneno In Asmanan et hit nekak nanan, etun hit bisa tahiin are' kanan rais reko re' In nmoe' sin neu kit.

¹³ Nati' te, hit ta'uab rasin naan. Fin hai mitoon rasin re' Uisneno In Asmanan nanoni' sin neu kai. Rarit hai ka minoni' fa tuaf ampaek uab re' antaam neu mansian ii tenab. Mes hai minoni' mpaek uab na'ko Uisneno In Asmanan, neu tuaf re' nahiin Je. ¹⁴ Mes karu nmui' tuaf re' ka nahiin fa Uisneno In Asmanan, rarit in nneen hai uab ein, in ka ntoup reko fa. In natenab, "Saa' na es re' naan? Ka ntaam fa neu tenab ma ronef!" Te kaah, maski on naan amsa', tuaf naan ka bisa nahiin fa rasin naan, fin In ka nmoni nmafuit fa nok Uisneno In Asmanan. ¹⁵ Tuaf re' nmoni nmafuit nok Uisneno In Asmanan, es re' bisa nahiin are' kanan rasin naan, ma bisa nahiin mee es re' batuur. Mes tuaf bian sin n'ukur ate ka niis naan fa tuaf naan. ¹⁶ Bisa on mee? Fin matu'i nbi Suur Akninu' mnak:

"Sekau bisa nahiin ma nakeo Uisneno In tenab?

Ai' sekau es re' bisa n'ator ma nreun Uisneno,

he In nmoe' natu in tuaf naan in fainekat?

Ka tiit fa tuaf mese' msa', tua!"✧

✧ **2:16** Nai' Yesaya 40:13

Te kaah, hit bisa tahiin rasin naan, natuin Kristus anturun ma nbaab kit he hit bisa tatenab tatuin In tenab.

3

Hit apirsait ii ro he tmeup nekaf mese' teu Uisneno, ma kais atmatoe es nok es

¹ Aok-bian manekat arki! Neno naan oras au 'bi naan, hi on re' tuaf re' ka mmafuut fa fe' mok Uisneno In Asmanan. Fin hi suma mroim mituin hi roim ein kiim, on re' mansian biasa. Es naan ate, au ka bisa u'uab 'ok ki fa on re' atoni mnasi', fin hi on re' ri'aan ein fe'. ² Au ro he unoni' ki anmatoom nok rasi re' ma'kaaf aah, fin hi ka mibarab fa fe' he mtoup rais ma'fena' re' he taknutu' tteni' on re' ri'ana' re' ka bisa fa fe' he neuk sisi. Te kaah, hi ro he mi'bei' on re' atoni mnasi' re' biasa neuk sisi. Mes oras ia, hi fe' on re' ri'ana kru'uf re' suma nahini haa he nsuus.✧ ³ Fin hi fe' mitenab on re' tuaf re' suma natuin sin roimk ein kuuk. Karu nmui' tuaf re' aneis ki, hi mitiun goe, ma mmatoe es nok es! Es naan ate, au 'ak hi suma mituin hi roim ein kiim. Nok ranan naan, hi on re' mansian biasa nbi pah-pinan ia goah. ⁴ Natuin hi bian mak, "Au re' ia, nai' Paulus iin na!" Ma bian mak, "Au re' ia, nai' Apolos iin na!" Ansuun oras hi mi'uab on naan, hi miruru' ma mikrira' mak, hi huma' mese' on re' mansian biasa goah.✧

Hi re' naan on re' poo'n es

⁵ Te kaah, nai' Apolos naan, sekau? Ma au, nai' Paulus re' ia, sekau? Fin hai nua kai re' ia, suma mjair aan reun ahaa. Hai es re'

✧ 3:2 Atoin Ibranis 5:12-13 ✧ 3:4 1 Korintus 1:12

miruru' ma mikrira' ranan he hi bisa mpirsai Kristus. Nai' Apolos nanaoba' mepu natuin Usi' In aprenat. Ma au on naan amsa'. ⁶ Au es re' utoon uhun-huun 'eu ki anmatoom nok Kristus. Naan on re' au es re' a'seen fini. Rarit nai' Apolos neem nanoni' ki. Naan on re' in es re' anpoin finin re' au 'seen a'rair sin. Mes Uisneno naan, In es re' anmoe' finin naan natoron, nmonin, na'naen ma namrian.✧

⁷ Onaim tuaf re' anseen finin, in ka ma'osa' fa. Ma re' anpoin finin naan, in ka ma'osa' fa msa'. Suma rais jes re' ma'osa', es re' Uisneno. Fin In es re' anmoe' finin naan anmonin ma namrian. ⁸ Tuaf re' anseen, ma tuaf re' anpoin, sin anmepun nabu-buan, sin on re' ameput bubu mese'. Ma too mfaun re' nanaoba' Usi' In mepu, of In nbaras sin suus-haet ein naan. ^{9a} Fin hit tbu'-bua' atjair Uisneno In ameput. Ma hi mjair on re' Uisneno In po'on re' In he nmeup naan.

Hi re' naan, on re' uim jes

^{9b} On naan amsa', hi on re' uim jes, re' Uisneno he nafena'. ¹⁰ Uisneno naruru' ma nakrira' In nekan arekot neu kau. Etun au on re' a'naak tukan. Rarit Uisneno nturun ma nbaab kau he au unoni' ki 'eik rasi 'suik fein na'ko unu', he uhake' fanderen re' ma'tani' 'bi hi 'monim. Rarit tuaf bian nanoni' ki, he sin nafeen ein anbin fanderen naan in tunan re' au 'mo'e. Mes tukan mese'-mese' ro he nmeup rek-reko he nafena' rek-reko ma batuur. ¹¹ Fanderen re' ma'tani' nhake nrair, es re' Yesus Kristus. Onaim ka nmui' fa tuaf es, re' bisa nafena' fanderen bian anbi hi neekm

✧ **3:6** Haef ein sin Reta' 18:4-11,24-28

ein, fin Uisneno nahake' nrair fanderen re' ma'tani' ma batuur.

¹² Tebes, of anmui' tuaf re' he nafena' anbi fanderen naan npaek ramuan huma'-huma'. Bian anromin he npaken ramuan on re' noni mnatu', noin muti', ai' faut arimat. Bian he npaken ramuan biasa on re' hau, huun, ai' huu-musu. ¹³ Mes ansuun-suun ameput in meup goe of mamnita', ma too mfaun ein niit ma nahiin in mepu naan, reko ai' kaah? Fin oras Uisneno of nafeek ansuun tuaf in rasi, Uisneno he n'ui je, nahuum on re' In npaek ai' he nakrira' tuaf-tuaf in meup goe bisa ntahan aa oo, ai' kaah? ¹⁴ Karu an'ui nrair tuaf es in meup goe npaek ai, ma ramuan re' in npaek je naan bisa ntahan fe', Uisneno of anfee in upan anbi neon goe tnanan. ¹⁵ Mes karu an'ui nrair tuaf-tuaf in meup goe npaek ai, ma ramuan re' in npaek je he nahake' nbi fanderen naan anputu te, Uisneno ka nfee fa neu tuaf naan upan saa'-saa'. Mes tuaf ameput naan bisa napein fetin fe', maski in on re' tuaf re' naen anpoi na'ko uim aputus, ma in he noi nmaet.

Hi re' naan, on re' Uisneno In uim onen es

¹⁶ Hi ro he mihiin mak, hi on re' Uisneno In uim onen es amsa', ma In Asmaan ee natua nbi in nanan* ¹⁷ Ma karu nmui' tuaf re' nareu' Uisneno In uim onen, es re' In bare' 'tua-ha' naan, ampaant om, oo! Uisneno of nareu' niis ne msa'! Fin Uisneno In uim onen naan, kninu'. Es naan ate hi ro he kninu' msa'.

¹⁸ Ho kais mupoi ho tuam aan! Karu ho maan ho tuam aan ahinit, ma muhiin main are'

* **3:16** 1 Korintus 6:19, 2 Korintus 6:16

saa'-saa' ii ok-oke' mutuin abitan pah-pinan oras ia sin mahiink ein, naan makrira' maat-maat anrair nak, ho ka muhiin fa rasi mese' msa'. Karu ho mukeo ma msadaar mak, ho ka muhiin fa saa'-saa', na' ho bisa mmurai munoni'. ¹⁹ Mansian pah-pinan oras ia sin tenab naan, Uisneno naan ee amoont ahaa. Fin matu'i et Suur Akninu' mnak,

“Anmui' tuaf re' naan in tuan ee, ahinit ma amanoet,
mes Uisneno of anpaek sin tenab ma roen
reu'f ein naan kuuk,
rarit nakreo ma namouf nafani' he
nareu' sin!”[☆]

²⁰ Matu'i nbi surat bian am nak,

“Hit Usi' nahiin ma nakeo nrair saa' re' atoin
ahiint ein natenab,
ma tuaf re' ro tebes nahiin he nmoe' on
mee,

In nahini nrair nak, sin suma natenab are' rasi
re' ruum am parsuum aah.”[☆]

²¹⁻²² Onaim hi kais maikas ma minaib tuaf es mak, in ro ma'tani'. Fin Uisneno es re' nait nanaib tuaf he na'naak ki. Are' saa'-saa' ii ok-oke' anjair hi ngguin een. Onaim hi a'naakt ein, on re': au, nai' Apolos, ma nai' Petrus,* hai ok-oke' mjair hi ngguin. Ma are' kanan rasi nbin pah-pinan ia, anjair hi ngguin amsa', maski hi mmoin ai' mmaet, oras ia ai' amnemat, are' saa' ii ok-oke' njair hi ngguin.

²³ Ma hi mjair Kristus Iin na. Ma Kristus anjair Uisneno Iin ja.

[☆] **3:19** Nai' Ayup 5:13 [☆] **3:20** Siit Pures-Bo'is sin 94:11

* **3:21-22** Suur Akninu' uab Yunani ntui nak, *Kefas*. Kefas naan, nai' Petrus in kanan bian.

4

Kristus In haef ein re' In nreek ma nsonu' sin neun mee-mee

¹ Onaim hi ro he maan kai on nai: kais maikas ma minaib kai, fin hai re' ia, suma Kristus In aan renu' ma aan reka'. Ma Uisneno anpirsai kit he tpafa' ma tpanat In rasin re' unu' fe'e te ma'niif ein. ² Tuaf re' anpao in uisn ee in baer' ein, in ro he njair tuaf re' anmoe' natuin saa'-saa' re' batur ma namnoon. ³ On mee nok au? Au 'meup utuin saa'-saa' re' batur aa oo, ai' kaah? Au ka 'rae utuin fa hi mnilei ma mitaib meu kau, on mee. Ma au ka 'rae utuin fa biak ein sin rais taiba' neu kau, on mee msa'. Au ka 'rae utuin fa au rais taiba' 'eu au tuak. ⁴ Fin maski au neek ii natenab nak, au reok goen, naan ka neu fa he in a'moufn ii nak, au reko kau goen. Re' pentiing ii, Uisneno nnilei ma ntai kau on mee. ⁵ Onaim hi kais ammoe' jom on re' afeek rasi, he mnilei ma ntai biak ein. Ampao Usi' ankoen On anfain neem. Fin In es re' anfei nain are' kanan rasi. In es re' anheer ma npoe napoitana are' kanan rais maufinu re' atoni' nmoe' ma na'koro' sin anbin meis'okan. In nroim he nakrira' are' kanan rasi anbi atoni' in tenab ma in nekan. Rarit Uisneno nroim he natoon rais rekon re' tuaf ein anmo'e nrair sin.

⁶ Aok bian arki! Au u'wab anmatoom nok au ba'e nai' Apolos, nahuum on re' au 'fee 'tope' he hi bisa minoni' rais jes na'ko kai, on nai: *Ammoe' mituin rasin re' matu'i anbi Suur Akinu' Uisneno nmees jah. Kais ammoe' mituin bian antein.* Karu hi minoni' rasi naan, hi kais ammapeis, ma mifeef ko'u natuin hi mituin tuaf es, ma mkana'paar biak ein. ⁷ Onaim on

mee? Hi maan hi tuam ein atoni' 'tet-teta', oo? Kaisa' on naan! Fin are' kanan saa'-saa' ein ok-oke' re' hi mtoup sin, hi mipein sin na'kon Uisneno. Onaim karu on naan, nansaa' am es hi mpaas hi 'baasm ein, nahuum on re' hi m'usaha mmees-mees kiim? ⁸ Nahuum on re' saa'-saa' ein ok-oke' re' hi mperluu sin, hi mipein sin een. On re' hi amu'it amrair jen! Hi mmoe' jom on re' kaes ko'u, on re' uisf aan, ma hai ka msero' fa msa'. Te kaah, Uisneno es re' anfee saa'-saa' ein ok-oke' re' hi mperluu sin. Mes karu hi mjair usif batuur ate, of oni' hai bisa mnaa' aprenat mibu-bua mok ki, oo?

⁹ Hai re' ia, Uisneno anhaefan kai mnao meu mee-mee mbi pah-pinan ia, he m'eut ma mitoon meu tuaf-tuaf anmatoom nok Kristus. Mes neot es-neot es au utenab 'ak of oni' Uisneno anreun kai mhake mbi koit re'-re'uf, nahuum on re' atoin bui re' anpao hukun a'maten. Rarit In nfee neu too mfaun ein ok-oke' anbin pah-pinan, ma In ameput sonaf neno tunan sin, he sin nkius ma nnonton kai. ¹⁰ Hi ma'tain reu'f ein ki, ai'! Anmui' tuaf naan ki nak, atoin ahinit, natuin hi arki mmafutu' mbi Kristus. Mes sin naan kai, amonot rek-reko, natuin hai mjair Kristus Iin na. Sin nateenb ein nak, of oni' hi arki re' naan, ma'tain reu'f ein ki. Mes hai arkai, aperot ma akrait aah. Of oni' sin naikas ma ntuna' na'rat-ratan ki. Mes sin ka nhormaat kai fa kre'o msa'. Ro bainesi'! ¹¹ Antea oras ia msa', hai mnaben neu hai mimnaah ma mmeon. Hai tai-paekn ein nakroen re'un. Biak ein anbeos kai piut-piut. Hai mjair atoin atoes re' ka nmui' fa umi. ¹² Hai mhae mate mbi mepu meik hai 'niim ein kiim. Karu atoni' na'uab

rafu'-rafu' anmatoom nok kai, hai mitaah am mak, "Hai mtoit he Uisneno nmoe' ma ntao rais reko neu ki." Karu tuaf nasusab kai, hai mifeek he mhaek mibaar, maran ma msabaar aah.✧ **13** Karu atoni' na'uab na're'uf hai kaanm ein, hai mpiir maan ranan he mbaras sin meik uab reko ma mamina'. Maski on naan amsa', atoni' fe' naan kai on re' skuku' ai' makrafu', re' an'oemetab re' he tait itpoirn aah ee.✧

14 Au 'tui rasin re' ia, ka neu fa he umaeba' ki. Mes au 'roim he ukain ki, natuin au 'neek ki nahuum on re' au aanh aa kuuk. Etun au utoon ki, he mtebi mfain mituin raan reko ma batuur. **15** Maski anmui' too nifun re' naruru' ranan neu ki anmatoom nok Kristus, mes suma au kuuk es re' a'jair hi ama'. Fin au re' ia, es re' utoon uhun-huun 'eu ki anmatoom nok Yesus Kristus In Rais Reko. Etun hi mpirsai meu Ne. Au 'moe' on naan, natuin au 'mafuut ma'tani' 'ok Ne. **16** Onaim au 'toit 'eu ki he hi mituin mirek-reko' au 'heta' ma 'tope'.✧

17 Es naan ate, au 'reek ma 'sonu' nai' Timotius he nturun ma nbaab ki. Au 'neek ee nahuum on re' au aanh aa kuuk. Au 'pirsai je, fin in nmoni nmafutu nbi hit Usi'. In of anturun ma nbaab ki he namnaub ki, anmatoom nok au 'monik. Au 'moink ii on naan, natuin au 'mafuut 'ok Kristus, re' Uisneno ansoun Ee ntaam neem. Ma rasi naan huma' mese' on re' au unoni' msa' 'eu too srani' sin re' nabuan pukan-pukan anbin mee-mee.

18 Anmui' tuaf na'ko ki natenab am nak, au ka 'jair fa he 'eit 'eu naan. Es naan ate, sin na'naeb ok. **19** Mes karu hit Usi' nroim, ka

✧ **4:12** Haef ein sin Reta' 18:3 ✧ **4:13** Atoin Ibranis 11:38

✧ **4:16** 1 Korintus 11:1, Filipi 3:17

'roo fa ntein ate, au 'uum 'eu kota Korintus. Rarit au of uhiin ain, kar-karu atoin ein re' ia suma nafeefn ahaa oo, ai' batuur sin nmu'in kuasa! ²⁰ Fin Uisneno naan, Usif re' anmui' kuasa. Rarit lin na ka npaek fa feef mamina' he nafena' atoni' in rais pirsait, mes sin npaek kuasa re' batuur. ²¹ Rarit hi roim ein on mee? Karu au 'uum ate, au u'uab ma'tani' ma 'fee hukun 'eu ki? Ai' au 'uum ukrira' rais manekat nok neek ma'nura'?

5

Anmui' tuaf et jemaat ii anmakoin

¹ Au 'neen nak, anmui' tuaf es et hi jema'at naan, anmakoin. Te kaah, re' in nmoe' je naan, maufinu nneis na'ko atoni' re' ka nahiin fa Uisneno. Fin in ntuup nok in aamf ee in fee muni'.[☆] ² Mes hi beo'm ein ii kah een, nahuum on re' hi jemaat ii reko kuun! Batuurn ii, hi ro he mimaeb om ma msuus. Tuaf on re' naan, hi ro he mriu' mipoitn ee nnao na'roo-'roo!

³ Maski hit maka'rona' es nok es, mes au neek ii natua nabaar nok ki. Onaim au ufeek a'rair amaufinut naan in rasi, nahuum on re' au 'bi 'ain naan. ⁴ Au 'mui' hak he ufeek on naan, natuin Nai' Yesus hit Usi', ma au re' ia, In haef. Rarit hi ro he mtook mibua he mifeek rasi naan, meik Usi' In kanan. Ma au neek ii nabua nok ki msa'. ⁵ Rarit hi mnona' ma mfee tuaf naan meu niut reu'f ein sin a'nakat, he 'roo-'roo te, tuaf re' naan nait inporin rais maufinun re' etan in nekan. Rarit karu hit Usi' ankoen On anfain neem ate, In bisa nsoi nafetin tuaf naan na'ko in saant ein.

☆ **5:1** Surat re' Nareta' Nafani' Raan A'honis 22:30

⁶ Ka reko fa karu hi mifeef! Kais amnikan mak, hit tsero' raur teif a'kreo' goah, he tasaeb uut anjair utunu' no mes-mese'. Raur teif naan on re' atoni' in maufinun. Rarit, karu hi mkoon ee he nmoe' rais maufinu anbi hi sonam ma hi tnanam, of too srani' bian sin anmo'en maufinu msa'![☆] ⁷ Amriu' atoin maufinu naan na'ko hi jema'at, on re' unu' te, atoin Yahudis nait inporin raur teif ein ok-oke' na'kon sin uimm ein he sin nabaarb ein bukae fesat Paska. Nok ranan naan, na' hi bisa mfani mjair on re' tuaf re' ka nmui' fa sanat anbi in nekan antein. Hi ro he mjair on re' naan. Unu' te, sin nroro 'bib-kaes ana' re' ka nmui' fa sanat he nfee fua'-turu' Paska. Namuni te, sin na'maet Uisneno In Tuaf Akninu', he njari 'turu' re' nakninu' hit nekak.[☆] ⁸ Unu' te, atoin Yahudis sin nbukaen fesat Paska npaken utunu' re' ka npaek fa raur teif. Oras ia, hit on re' utunu' re' ka npaek fa raur teif. Es naan ate, hit ro he tpafa' ma tpanat hit tuak ii kuuk he kais atmoe' rais maufiun ein, ma kais atmoe' biak ein neek ein namenan. Hit ro he ta'uab namneo piut-piut. Nok ranan naan, atoni' niit nak, hit tmoe' saa'-saa' ii tatuin hit nekak arekot.[☆]

⁹ Unu' te, au 'tui 'iit surat 'ak, "Kais amseor gom mok tuaf-tuaf re' anmakoin nok tuaf re' ka in fee ja fa, ai' ka in moen ja fa." ¹⁰ Au ka 'mui' fa sarit he hi kais amseor gom mok *too mfaun ein ok-oke'* nbi pah-pinan re' ka ntae natuin fa Uisneno, ai' atoin akomat, ai' aputa-kriut re' nputa-kriu naan atoni' in bare', ai' araut

[☆] **5:6** Galatia 5:9 [☆] **5:7** Anpoin na'kon Pah Masir 12:5

[☆] **5:8** Anpoin na'kon Pah Masir 13:7, Surat re' Nareta' Nafani' Raan A'honis 16:3

ein. Fin karu on naan ate, hi ro mbaits om mi'ko too mfaun ein ok-oke' anbin pah-pinan.

¹¹ Mes oras ia, re' au u'uab ee naan, es re': hi kais amseor gom mok tuaf re' nak in njair atoni srani', te kaah, in amakonit, ai' akomat, ai' araut, ai' na'uab na're'uf atoni' in kanan, ai' amauf raru, ai' aputa-kriut he ntoup naan biak ein sin baer' ein. Hit kais atseor gok tok atoni' human on re' naan. Kais ambukae mibua mok sin amtein!

¹² Hi mmui' hak he mtai ma mnilei atoni srani' sin a'moink ein. Mes au ka 'mui' fa hak he ufeek rasi 'eu tuaf re' ka npirsai fa Uisneno.

¹³ Fin In kuun of es re' nafeek rasi neu tuaf re' ka npirsai Je fa. Mes hi kais amnikan Uisneno In Suur Akninu' re' matu'i mnak, "Tuaf re' anteek in tuan anjair Uisneno lin na, mes in nmoe' rais maufinu piut-piut, amriu' mipoitn ee, tua!"[☆]

6

Atoin apirsait kais ammatrakan meu afeek rasi mok aom-bian apirsait bian

¹ Karu tuaf asraint es anmaka'rasi' nok tuaf asranit bian, nansaa' am es hi mnao meu afeek rasi re' ka nahiin fa Uisneno? Nansaa' am es on naan? Reko nneis ambaiseun atoin apirsait ein, he sin es re' n'urus hi rasi! ² On re' hi ka mihiin fa mmak, atoin apirsait ein re' of nafeek rasi neu are' too nbin pah-pinan ia. Onaim nansaa' am es hi kiim ka mibei' fa he

[☆] **5:13** Surat re' Nareta' Nafani' Raan A'honis 13:5, Surat re' Nareta' Nafani' Raan A'honis 17:7, Surat re' Nareta' Nafani' Raan A'honis 19:19, Surat re' Nareta' Nafani' Raan A'honis 22:21,24, Surat re' Nareta' Nafani' Raan A'honis 24:7

m'urus rais aan'-ana'? ³ Batuurn ii, hit es re' he tafeek Uisneno In ameupt ein sonaf neno tunan sin rasin. Onaim ro tebes hi es re' am'urus rasi nsuun-nsuun neno. ⁴ Saa' antein, karu hi apirsait ammaka'rasi' nok rais aan'-aan' ein, nansaa' am es hi mpaek afeek rasi re' atoni srani' sin ka nhormaat sin fa?

⁵ Au he u'uab rasi piis es, re' anmoe' ki he hi ro he mmae mmaet. On mee? On re' ka tiit tain fa tuaf es anbi hi sonam ma hi tnanam, re' bisa n'urus nahiin hi rais aan'-aan' ein, on re' rasi re' anpoi ma nboor anbi hit aok-bian. ⁶ Mes apirsait es anheer neik in aon-bian apirsait neu afeek rasi! Te kaah, afeek rasi naan ka npirsai fa Uisneno!

⁷ Naan ka batuur fa, oo? Nisan nain ki goen ate, karu hi mmatrakan es nok es. Reko nneis, amkonan ho aom-bian karu in nmo'en nsaan neu ko. Ma karu ho aom-bian apirsait nabaak naan ho baer es, maut he in npaar kuun bare' naan! ⁸ Mes hi atoin apirsait es anmo'e nsaan neu in aon-bian. Ma tuaf es nabaak tuaf es. Te kaah, hi arki atoin apirsait ok-oke'.

⁹ Hi on re' ka mihiin fa are' rasin re' ia! Te kaah, tuaf re' ka nroim fa he nmoe' rais amneot ma ammonot, ka neu fa he ntaam anjair Uisneno In nonot-asar sin. Kais amkonan hi tuam ein he mtoup rais poi, he hi misanab! Tuaf re' nmakoin nok ka in fee ja fa, ai' ka in moen ja fa, araut, amakaket, atoni' nkoin atoni', ¹⁰ abakat, akomat, amauf raru, tuaf re' ankana'paar es in kanan, aputa-kriut he ntoup naan tuaf es in bare'. Fin tuaf-tuaf ein on re' naan, ka neu fa he ntaam anjarin Uisneno lin na!

¹¹ Te kaah, unu' te, hi bian on re' naan amsa'! Mes Uisneno nsaok ma nnoes nain hi saant ein, ma In nakninu' ki. Ma In nfei ranan amsa' he hi bisa mireko mfain mok Ne. In nmoe' are' rasin naan, natuin hi mmafuut mok hit Usi' Yesus Kristus, ma natuin hi mmafuut mok Uisneno In Asmanan amsa'.

Karu ho mpijaar ma mpairoir ho aom, naan nakrira' rais hormaat neu Uisneno

¹² Au 'mui' hak he 'moe' are' saa'-saa'. Mes are' saa'-saa' re' au 'roim he 'moe' sin naan, ka neu fa he njair reko neu kau. Rarit maski au 'mui' hak he 'moe' are' saa'-saa', mes au ka 'roim fa he rais reu'f ii in kuasan na'naa' kau.*

¹³ A'tope' es, es re' anmui' tuaf nak, "Amnaht ii nperluu taif, ma taif anperluu mnahat." Mes mimnau, fin Uisneno of nareu' nain sin nua sin.

A'tope' bian antein, hit ka tpaek fa hit aok ii he tmakoin tok bifee re' ka hit fee ja fa, ai' atoni' re' ka hit moen ja fa. Hit tpaek hit aok ii he hit bisa tmeup teu hit Usi'. Ma hit Usi' In es re' anpijaar ma npairoir hit aok. ¹⁴ Oras hit Usi' Yesus anmaet, Uisneno es re' namonib nafain' Ee. Onaim karu hit tmate trair, In anmui' kuasa he namonib nafani' kit amsa'.

¹⁵ Hi aom ein anjarin Kristus Iin na, nahuum on re' hi mjair biaf mi'ko Kristus In aon. Hi of mihini mrair rasi naan! Onaim karu au 'paek Kristus In aon, ma 'nao 'seor goe 'ok bifee a'hake', naan on mee? Kaisa'! Fin rasi naan, ka pantas fa! ¹⁶ Hi of mihini mrair, karu atoni' ntuup nok bifee a'hake' on re' naan, sin nua sin nmafutu njarin mese'. Fin matu'i et Suur Akninu' mnak, "Sin nua sin nmafutun njarin

* **6:12** 1 Korintus 10:23

mese'." ✧ 17 Mes tuaf re' anmoin nekaf mese' nok hit Usi', anjair mese' nok Ne, nahuum on re' sin nua sin anmafutun nok asmanaf mese'.

18 Karu ho mupein mainuan he mmakoin mok bifee re' ka ho fee ja fa, ai' atoni' re' ka ho moen ja fa, mu'roba' ho tuam aan mu'ko rasi naan! Amoe' sanat huma'-huma' es re' nareu' sin tuak ein kuuk, ma nareu' biak ein imsa'. Mes tuaf re' na'hake' naan, nareu' kuun in aon.

19 Ho aom aan nahuum on re' uim onen neu Uisneno In Asmanan. In Asmanan naan es re' anmoin et hi neekm ein, fin Uisneno kuun es re' anfee In Asmanan neu ki. Es naan ate, hi kiim ka mmui' fa hak amtein, he mjair usif meu es-es ate in aon aan kuun. Mes nansaa' am es hi mmoin on re' ka mihiin fa are' rasin re' ia? ✧

20 Kristus ansoi naan ki neik baen ma'oos re'uf. Rarit hi ro he mmoin ma mhormaat hi aom ein kiim, he mikrira' am mak, hi mhormaat Uisneno.

7

Rasi anmatoom nok fee-mone sin

1 Oras ia, au he 'tui anmatoom nok are' rasi re' hi mitanan sin imbi hi surat am mak, "On mee? Reko nneis atoin ii, kais ansao, oo?"

2 On nai: natuin anmui' mainuan fani-fani he tuaf bisa nmoufu nbi rasi 'bu'uf amre'ut, es naan ate, reko nneis atoin es ansao in fee ja kuun. On naan amsa', bifee jes ansao in moen ja kuun.

3 Atoin mafe'e ki! Kais ampenan ho fee jan in hak he ntuup nabua nok ko. Ma bifee mamone' ki! Kais ampenan ho moen jan in hak he ntuup

✧ 6:16 Reta' Ahun-hunut 2:24 ✧ 6:19 1 Korintus 3:16, 2 Korintus 6:16

nabua nok ko. ⁴ Fin bifee mamoen ein annona' nrair sin aok ein anjarin sin moenk ein sin a'mui'k ein. Ma atoin mafe'e annona' nrair sin aok ein anjarin sin feek ein sin a'mui'k ein. ⁵ Onaim hi kais ammarara'koit, fin hi nua ki ammui' hak! Onaim karu hi he m'onen, ma ka mroim fa he mitenab meu rasi bian, bisa mtahan hi tuam ein akre'o, he kais amtuup mibua mbi oors es. Asar fee-mone ki mi'uab rek-reko nahuun fe', ma hi m'akoor. Karu oras onen naan oek' een, reko nneis hi nua ki mibua mfain rabah. Fin karu ka on fa naan ate, ampaant om! Fin niut reu'f ein sin a'naakt ee, na'oki' tuaf ate rabah, neu tuaf-tuaf re' ka nabei' fa he ntahan in tuan aa kuun. ⁶ Rasi re' ia, au suma 'fee je utuin au penit, ka Uisneno In atoorn aa fa. ⁷ Utuin au tenab, reko nneis kais amsao, on re' au re' ka 'sao fa. Mes Uisneno nfee mahinif ma manoef ansuun tuaf, natai nok tuaf naan. Rarit bian In nkonan sin he nmatsaon. Ma bian In ka nkonan sin fa he nmatsaon.

⁸ Au he utoon 'eu atoin munif ma bifee munif re' ka nsaon fa fe', ma 'eu baun bifee ngguin 'ak, reko nneis hi kais amsao, on re' au re' ka 'sao fa. ⁹ Mes karu ka bisa mtahan maan fa hi tuam ein aan, reko nneis amsao. Reko nneis amsao, fin karu kaah fa te, ho snaas reu'f ee of naah nafani' ko.

¹⁰ Rasi re' ia ka na'ko kau fa, tua. Fin au he utoon saa' re' hit Usi' naprenat anrair neu amatsaos ein am nak, bifee mamone' ka nabei' fa he nporin nain in mone. ¹¹ Mes, karu in nporin in mone, in kais ansao ntein. Reko nneis, in ntebi nfain ma naraem on nok in mone. On naan amsa', atoin mafe'e ka nabei'

fa he mporin in fee.✧

¹² Rasi re' ia na'ko kau, ka na'ko fa hit Usi'. 'Eu tuaf bian sin, au he u'uab on nai: karu atoin asraint ii in fee je ka npirsai fa Kristus te, in kais anporin bifee re' in nsao naan ee naan, karu bifee sa'o naan anroim he nmoin na'kii' nok ne piut. ¹³ On naan amsa', karu anmui' bifee mamone', re' in moen je ka npirsai fa Kristus te, in kais anporin atoni' re' ansao naan ee naan, karu atoin sa'o naan anroim he nmoin na'kii' nok ne piut. ¹⁴ Fin atoin sa'o re' ka npirsai fa Uisneno kninu' msa', natuin in nmafutut nok in fee. Ma bifee sa'o re' ka npirsai fa Uisneno kninu' msa', natuin in nmafutut nok in mone. Karu kaah fa te, sin aanh ein ka kniun' ein fa. Mes nok ranan ia, sin ntoupu nrair marak akninu' anbi Uisneno In human ma In matan. ¹⁵ Mes karu anmui' atoin sa'o ai' bifee sa'o re' ka npirsai fa Uisneno, re' nporin nain in fee ai' in mone apirsait ate, mkonan sin. Rarit atoin sa'o ai' bifee sa'o re' anpirsain neun Uisneno, ka nmafutu' ntein fa on re' naan. Fin Uisneno no'en ma nnapen ki, he mjair lin na, he hi bisa mmoin nok mamut, rame' es nok es, ma tainina'. ¹⁶ Bifee mamoen ein re' apirsait ein! Ho of oni' bisa msoi mufetin ho mone. Of oni' ka bisa fa. Atoin mafe'e re' apirsait ein! Ho of oni' bisa msoi mufetin ho fee. Of oni' ka bisa fa msa'. Hi ka mihiin fa namneo, tua.

Mituin mirek-reko' Uisneno In Raan A'ho-nis

¹⁷ Maski on naan amsa', mes ansuun-suun tuaf in a'tokon ma in a'haken on mee-on mee

✧ **7:11** Nai' Mateos 5:32, 19:9, Nai' Markus 10:11-12, Nai' Lukas 16:18

msa', oras Uisneno no'en naan ki mjair Iin na te, ammoin piut on re' naan nai. Kais mi'bani' mtein' ee, fin Uisneno es re' an'ator anrair je on re' naan. Au unoni' 'eu jemaa't ein ok-oke', atoran re' ia.

¹⁸ On re' hi mi'heri' miit he mikrira' mmak, hi atoin Yahudis, namuni te na' hi mneen Uisneno no'en ki te, kais misuan a'heri' naan. Ma atoni' re' ka na'heri' fa, oras anneen Uisneno no'en sin anjarin Iin na te, kais mi'heri' he njair tanar nak, sin njarin nrarin Uisneno Iin na. ¹⁹ Karu mi'heri' miit ate, naan ka ma'osa' fa. Ma karu ka mi'heri' fa te, naan ka ma'osa' fa msa'. Re' ma'osa' es re': hit tmoe' tatuin Uisneno In apreent ein. ²⁰ Oras Uisneno anpiir ma nbetis naan ki mjair Iin na, In ka nreun ki fa he mi'heri' ai' ka ma'heri' fa. Onaim maut he hi mibaar on re' naan, tua.

²¹ Au 'fee 'teni' a'tope' es antein. Karu ho mjair atoni' in ate oras Uisneno no'en ko te, ho mubaar on re' naan amsa', ka saa'-saa' fa. Mes on re' ho bisa mjair tuaf re' napein fetin na'ko ate, amjair on re' naan nai! Karu ka bisa fa he mupein fetin mu'ko ate, ka saa'-saa' fa msa'. ²² Fin oras Uisneno no'en ate he njair Iin ja, ate naan anjair atoni frei re' anmeup neu in Usin et baer a'ratas. Ma oras atoni frei jes he njair Uisneno Iin ja, atoni' naan anjair Kristus In aan renu'-aan reka'. ²³ Kristus anbaen nafeek anrair ki neik baen ma'oos re'uf! Onaim hi kais amjair ate meu tuaf bian.

²⁴ Aok-bian manekat arki! Oras Uisneno no'en ma nnapen ki mjair Iin na, hi 'tokom ma hi 'hakem on mee-on mee te, maut he on re'

naan nai. Kais mi'bani' mtein' ee. No maut nai on re' naan, neu Uisneno.

Rasi anmatoom nok ka amatsaos ein fa

²⁵ Hi mitaan kau anmatoom nok tuaf-tuaf re' ka ntuup-tuup niit fa he nseor gon nok bifee ai' atoni'. Uisneno ka natoon fa neu kau anmatoom nok rasi naan. Mes hi bisa mpirsai saa' re' au u'uab ee ia, natuin Uisneno nakrira' ma naruru' In rais kasian ee neu kau. Au teenb ii on nai: ²⁶ Oras ia hit tapein ha'mu'it huma'-huma'. Onaim karu atoni' on mee-on mee te, maut he in on re' naan nai. Au sairt ii on nai: ²⁷ Karu ho msao ma mmafutub ho tuam aan mok ho fee jan ate, kais ampoirn ee. Karu ho ka mmafuit fa heen mok ho fee jan antein ate, kais maim he msao mtein. ²⁸ Mes karu ho mjair he msao msa', nana ka nsaan fa. Ma karu anmui' bifee re' ka ntuup-tuup niit fa fe' nok atoni' rarit ansao, in ka nsaan fa. Mes mimnau, fin amatsaos ii of napein susat huma'-huma' anbi pah-pinan ia. Au sairt ii he hi kais amsuus on naan.

²⁹ Aok-bian manekat arki! Utuin au teenb ii te, on nai: oors ii npaumaak een, ma neon amsoupt ii npaumaak een. Atoin mafe'e, in kais natenab ma nakeo naan ahaa in fee jan kuun, mes in ro he natenab ma nakeo Uisneno msa'. ³⁰ On naan amsa', karu anmui' tuaf ankuur ma nkae, reko nneis in nha'tain in tuan he kais ankae, he in na'bei' he natenab ma nakeo Uisneno. On naan amsa', karu anmui' tuaf re' neekn ee nmariin, reko nneis in nmoe' in tuan ee he kais on re' naan, he in bisa natenab ma nakeo Uisneno. Karu anmui' tuaf ansoos na'bei' bare', reko nneis in nmoin on re' tuaf re' anma'mui', he in bisa natenab ma

nakeo nahiin Uisneno. ³¹ Karu anmui' tuaf anpaek bare' na'ko pah-pinan ia, reko nneis in nmoe' in tuan ee nahuum on re' tuaf re' ka nakfiirt on fa neu pah-pinan ia in baer' ein, maut he in natenab ma nakeo nahiin Uisneno. Natuin pah-pinan ia in ranan of namneuk nain.

³² Au 'roim he kais hi teenb ein an'ainuan ok. Fin tuaf re' ka nsao fa naan, in npaek oras mainuan anneis he natenab ma nakeo nahiin Uisneno In romin. Es naan ate, in bisa naim ranan he nmeup he nharineb Uisneno In nekan. ³³⁻³⁴ Mes re' anmatsao nrair, ro he nahiin ma nakeo pah-pinan ia in romin amsa'. In nroim he nahiin ma nakeo Uisneno In roimn ee, mes in ro he naim ranan he nharineb in fee je msa'. Naan anmoe' in teenb ee nbaits on neu-mneem.

On naan amsa' bifee re' ka nmatsao ntein fa, ma bifee re' ka nsao niit fa. Sin nahiin ma nakeo Uisneno In romin, he sin bisa nakniun' ein anbin sin neek ein ma sin aok ein. Mes bifee amatsaos ii, in neek ee nbaits on neu-mneem. Fin in nroim he nahiin ma nakeo Uisneno In romin, mes in ro he naim ranan he nharineb in moen je msa'. ³⁵ Au utoon are' rasin re' ia 'eu ki, he hi mipein in arekon. Ma au ka 'roim fa he 'eka' ki. Au roimk ii, hi mmoe' rais reko, mihiin ma mikeo Uisneno In romin, he hi teenb ein kais anbaits ok.

³⁶ Karu atoin ii anmu'i frei re' in toon anmoin naan ii nanokab he nsao goe, maut he in nsao. Saa' antein atoni' naan ka bisa ntahan naan fa in tuan. Sin ka nsanan fa saa'-saa' on naan. Kais amfe'-fe'en sin piut, rarit namuni te, atoni' naan anmoe' rais re'uf. ³⁷ Mes karu in bisa ntahan na'bei' in tuan, in kais nanapa' in tuan ee he nsao. Fin in nahiin neu in he

nmoe' saa'. Maut he in naran ma ntahan a'roo reko msa'. ³⁸ Onaim atoni' re' ansao in afrei, naan reko. Ma re' ka nsao fa naan, reko nneisi ntein.

Rasi anmatoom nok baun bifee ngguin

³⁹ Bifee mamone', ro mafutu' ma na'kii' nok in mone tar antea in nmaet. Mes karu in moen je nmate nrari te, in bole nsao ntein, asar in mone naan, apirsait neu Kristus amsa'.

⁴⁰ Utuin au penit, banu' naan in n'ua reko nneis karu in ka nsao ntein fa. Au utenab 'ak fainekat ia na'ko Uisneno In Asmanan re' nok kau.

8

Rasi anmatoom nok mnahat re' anpaek sin he nfuan

(Surat re' Nareta' Nafani' Raan A'honis 4:35,39, Surat re' Nareta' Nafani' Raan A'honis 6:4)

¹ Oras ia au he u'uab anmatoom nok sisi re' atoni' npaek je he nfua. Hit arkit tahiin rasi mfaun een, anmatoom nok rasin re' ia. In raisn ii, karu atoni' nahini mfaun, in bisa nabeo', fin in natenab nak in nahini nneis na'ko biak ein. Reko nneis, hit tmaneeek-neek tok biak ein kuuk. Fin naan es re' anmoe' are' tuaf ein okoke' anjarin ma'tani' ma bisa ntahan a'roo.

² Karu anmui' tuaf naan in tuan ee nak, in ahinit anbi are' kanan rasi, naan nakrira' ma naruru' mnak, in mahinin naan ka namtiis fa fe'. ³ Mes karu anmui' tuaf re' nneek Uisneno, Uisneno nahini nrair je. Naan es re' pentiing.

⁴ Onaim karu atoni' nbukae sisi re' anpaek niit ee he nfua, hit arkit tahiin tak, baer fuat

ein anbin pah-pinan ia, ka Uisneno batuur fa. Fin hit tahiin tak, "Suma anmu'i haa Uisneno mese' es re' batuur." ma "are' baer fuat ein re' atoni' na'besan neu sin, ka ma'osa' ma ma'ota' fa." ⁵ Anmui' bare' mfaun et neon goe tnanan ma pah-pinan re' atoni' anteek sin im nak, 'usi'.

⁶ Mes neu hit arkit, Uisneno suma mees' aah.
In re' naan, hit Ama'.

Are' saa'-saa' ii na'uun ma na'ba'an na'ko Ne.
Hit tmoe' are' saa'-saa' ii teu Ne.

Ma hit Usi', suma mees' aah.
Es re', Yesus Kristus.

Uisneno npaek Nai' Yesus,
oras In nmoe' are' saa'-saa' ii.

Ma hit tmoin,
natuin Nai' Yesus es re' anfee kit a'monif.

⁷ Mes anmui' tuaf re' ka nahiin fa rasin naan. Sin fe' natenab piut-piut anmatoom nok baer fuat ein, nahuum on re' saa' re' sin natenab niit ee oras unu'. Etun ansuun oras sin nbukae sisi re' atoni' npaek je he nfua, sin natenab am nak, "Bukaet re' ia, anjari nrair fua'-turu' he nfuun! Karu au uah mnaaht ein re' ia, au fe'e mafuut 'ok rais maufinun!" Onaim rasi naan nareu' sin teenb ein, tar antea sin ka bisa fa he nateenb ein namnoon ma namneo ntein' ein, natuin sin neek ein an'oren ma nakrait ein.

⁸ In raisn ii saa'? Bukaet ii ka bisa neik kit fa he tbaiseun Uisneno, ai'? Karu ka tbukae fa te, hit ka tmaufiun fa. Ma karu tbukae te, ka nmoe' kit fa tjair atoin reko, ai'?

⁹ Mes ampaant om! Maski ho mmui' hak he mmoe' rasi piis es, rasi naan ka neu fa he njair reko neu ko. Karu anmui' ho aom-bian apirsait es, re' in neekn ee n'oer, karu in niit ko mmoe' mo'et naan, rarit in nastuun anbi naa te, naan

ka reko fa! ¹⁰ Ho muhini mrair kuum, rasi pisa' naan, ka njair fa saa'-saa'. Mes karu aok-bian apirsait ein re' ao akrait ein ankius niit ko mtook ma mbukae mbi uim fuat, sin of nateenb ein saa'? In of natenab nak, tbukae mnaah fuat amsa' ka ntaam fa rasi neu ne ntein, maski sin npaek bukaet ein naan he nfuan. ¹¹ Ho muhini mrair rasi mfaun. Mes karu ho mmoe' on naan, ho mureu' tuaf neek a'oert ein. Ma tuaf naan ho aom-bian apirsait. Kristus anmaet neu ne msa' ate! ¹² Reko nneis mitenab on nai: karu ho mmoe' ho aom-bian re' neek ein an'oren he nmo'en rasi piis es, re' sin naan ee neu nsaan, ho es re' mmoe' sanat meu sin. Ma ho mmoe' sanat meu Kristus amsa'. ¹³ Onaim karu au uah amnahat re' anmoe' au aok-bian apirsait ein anmoufu nbin sanat, reko nneis au kais 'euk sisi ma 'uah amnahat human on re' naan. Maski tar antea nabar-baar amsa', kaisa', tua! Fin au ka 'roim fa he sin nmoufun nbin sanat.

9

Oras Uisneno nreek haefan Iin na, In nfeen sin hak ma kuasa

¹ Kais mitenab am mak, au ka 'mui' fa hak he 'tui on nai 'eu ki. Fin Uisneno anhaef kau 'nao 'eut ma utoon anmatoom nok Ne. Unu' te, au 'iit Nai' Yesus, hit Usi'. Au 'mafut piut 'ok Ne, rarit hi arki ok-oke' ampirsai Je, natuin au 'meupk aan. ² Maski tuaf bian sin ka ntoup kau fa 'jair Uisneno In haef, mes hi mihini mrari mmak, Uisneno nhaef kau he utoon In beno 'eu ki. Karu hi mroim he maim bukti te, mkius kiim hi 'tokom ma hi 'hakem. Fin hi arki mmafutu' fe' mok hit Usi'.

³ Au he utaa' 'eu tuaf-tuaf re' nasaeb kau sanat, on nai: ⁴ Kais-kaisa' hi mitenab mak, au 'ok nai' Barnabas ka mmui' fa hak he mtoup bukaet mi'ko tuaf-tuaf re' hai minoni' sin. ⁵ Kais-kaisa' hi mitenab mak, hai ka mmui' fa hak he msao bifee Kristen, re' bisa nokan he ntuthae kai nbın bare bian. Te kaah, Uisneno In haef bian sin, nok sin feek ein. Nai' Yesus In oirf ein on naan amsa'. Nai' Petrus anmoe' kuun on naan amsa'!* ⁶ Kais-kaisa' hi mitenab mak, suma au 'ok nai' Barnabas ammees jaah, es re' mmeup he maim roit, he hai bisa mmoin ma minoni' biak ein. ⁷ Hi teenb ein naan, in a'suikn ii saa'? Amkius kiim soraur s ein. Sin kais ansosan bukaet ma pake. Amkius kiim ameput anbi poo' anggur. Ka tiit fa es, re' antaar ee mnak, "Ho kais muah hau fua anggur sin!" Amkius kiim atuuks ein. In nmui' hak he naes susu na'ko 'bib-kasen re' in natuuk sin.

⁸ Au ka u'uab fa on naan, utuin au mansian biasa ia in teenb aa kuun. Fin Uisneno In Atoorn ein natoon rasi huma' mese' on re' naan amsa'. ⁹ Anbi ka'o Musa in Atoran matu'i mnak, "Oras bijae je anteir maka' he nbait s ee na'ko in asrakon, kais amfuut mi'temeb in fefan he in ka bisa naah fa." Kais-kaisa' hi mitenab mak, Uisneno nroim he bijae je nmees bisa naah.* ¹⁰⁻¹¹ Kaah fa, tua! In na'uab nak he nkius kai msa'! Fin matu'i mnak, "Abanit afu ma tuaf re' nbetis maak ma'puni' na'ko srakon, oras sin nmepun sin nahinin nak, sin of napenin sin sapaak ein." On naan amsa',

* **9:5** Suur Akinu' uab Yunani ntui mnak, 'Kefas'. Kefas naan, nai' Petrus in kanan es. ✧ **9:9** Surat re' Nareta' Nafani' Raan A'honis 25:4, 1 Nai' Timotius 5:18

reko nneis karu haef atoni' Kristen sin bisa ntoup sin sapaak ein, na'kon sin meupk ein sin aafk ein. Fin oras hai minoni' ki are' kanan rasi na'ko Uisneno In Asmanan, naan nahuum on re' atoin tani tuaf es anseen. Onaim oras hai minoni' mrair ki te, ka saa'-saa' fa karu hai mtoup bukaet ai' saa'-saa' mi'ko ki. Fin re' naan, ro pantas!☆ ¹² Tuaf sona' re' nanoni' ki, anmui' hak he ntoup bukaet ma bare' bian na'ko ki, ai'? Rarit, karu hai te, on mee? Hai hak ii anneis na'ko sin!

Mes hi mihini mrair. Hai ka mpaek miit fa hai hak he mi'tui' on naan. Hai maran ma mtahan ambi are' kanan rasi, he kais amtao ekat meu ki. Fin nok ranan naan, hi mroim he mneen ma mitniin Kristus In Rais Reko re' hai mireet Ee meu ki. ¹³ Mitenab miit! A'naak rais pirsait ein, re' antuthaen etan atoin Yahudis sin Uim Onen Uuf, sin nmonin na'kon fua'-turu' re' atoni' nataam sin. Ma tuaf re' antuthae nbi mei fuat, sin bisa nekun sisi na'ko mu'it re' tuaf nataam sin.☆ ¹⁴ On naan amsa', Uisneno anba'an nak, tuaf re' nmeup he nanaob Rais Reko, sin bisa nmonin na'kon sin mepun naan in afan. Naan es re' batuur.☆

¹⁵ Maski au 'mui' hak he 'moin on re' naan, mes au ka 'roim fa he 'moe' on re' naan. Au ka 'tui fa surat ia, nok sarit 'ak he hi msonu' ma mfee kau bare'. Au 'tuthae ki 'roo goen, ma ka 'toit 'iit fa saa'-saa' u'ko ki. Onaim reko nneis au 'maet, he atoni' kais natenab nak au 'murai 'toit ma 'toro'. ¹⁶ Maski au utoon atoni' piut anmatoom nok Uisneno In Rais Reko, mes naan ka njair fa 'sukif he au bisa u'uab

☆ **9:10-11** Roma 15:27 ☆ **9:13** Surat re' Nareta' Nafani' Raan A'honis 18:1 ☆ **9:14** Nai' Mateos 10:10, Nai' Lukas 10:7

be'o. Au ro he utoon 'eu tuaf anmatoon nok Uisneno, fin Uisneno es anreek kau on naan. Karu au ka 'moe' utuin fa au mepu on naan, au 'suus ma 'mei' 'iis ok! Fin au of upein hukun. ¹⁷ Karu au unaob mepu ia suma *natuin* au roimk ii kuuk, bare' re' au upein je naan, nahuum on re' ameput antoup in kai. Mes karu au unaob mepu ia *natuin* Uisneno anreek kau, naan a'teta'. Fin In npirsai kau, he 'panat In baer ma'osa'. ¹⁸ Onaim karu on naan, au upein upan ma pa'e saa'? Au ka 'perluu fa he 'toup kai! Au utoon Uisneno In Rais Reko, ma ka 'toit fa saa'-saa'. Naan es re' neik rais puas neu kau, tua. Ma rais puas naan, nahuum on re' au upein upan ma pa'e. Onaim au 'mui' hak amfaun on re' tuaf re' in meup goe es re' natoon Rais Reko, mes au kuuk ka 'roim fa he 'paek are' au hak ein naan, tua.

¹⁹ Au re' ia, tuaf re' a'ator kuuk au tuak utuin au romik. Atoni' ka nmui' fa hak he nreun kau he 'meup ia, ai', 'meup nee. Maski on naan amsa', mes au 'moe' au tuak ii on re' ate, he tuaf-tuaf anmui' hak he nreun ma naprenat kau. Nok ranan naan, au bisa 'turun ma 'baab too mfaun antein he sin naran ma ntahan natuin Uisneno. ²⁰ Onaim karu au ubua 'ok atoin Yahudis, au 'moe' au tuak ii on re' atoin Yahudis, he 'turun ma 'baab atoin Yahudis he sin nahiin Uisneno. Karu au ubua 'ok atoni' re' nnaa' naheran Uisneno In Atoran, au 'moe' utuin Uisneno In Atoran, he au bisa 'turun ma 'baab sin imsa' he nahiin Uisneno, (maski au uhiin 'ak, tmoe' tatuin Atoran naan ka bisa fa tareko tfain tok Uisneno). ²¹ Karu au ubua 'ok tuaf re' ka nahiin fa Uisneno In Atoran, au 'jair on re' sin, he 'eik sin antaam anjarin

Uisneno Iin na. (Au ka ufetin 'ain fa Uisneno In Atoran re' In nasanut sin nanete npeo' ka'o Musa, mes oras ia au 'moni 'paek Kristus In Atoran.)[✧] ²² 'Eu tuaf re' neekn ee n'oer, au 'moe' au tuak ii on re' au neek ii an'ore msa', he au bisa 'furi' sin he sin npaumaak Uisneno. 'Eu are' too mfaun ein, au 'moe' au tuak ii on re' sin, he on mee-on mee msa', au bisa 'turun he 'soi ufetin 'aan bian. ²³ Au 'moe' are' rasin re' ia, maut he are' tuaf-tuaf bisa npirsai Uisneno In Rais Reko. Nok ranan naan, hit bisa tapein sapaaf anbi are' rais arekot re' Uisneno nroim he nfee sin neu kit.

²⁴ Au 'fee 'tope' u'ko amnaenat. Tuaf namfau nok naenan, mes re' antaam nahuun gui, mese'. Onaim hi arki ok-oke' ro he maen miheer, he mjair tuaf-tuaf ahunut meu Uisneno. ²⁵ Are' amnokat anbi lomba ro he tebe-tebe nmoe' natuin ahaa saa' re' in anoin ee natoon. Bataur, aa oo? Sin anmepun ma'tani' on naan, he suma napenin a'piru 'nakaf re' of namnene haa. Mes karu hit, hit tmeup he tapein upan ma pa'e re' ntahan tar antea nabar-baar. ²⁶ Onaim au ka 'aen fa tafi'-tafi'. Mes au 'usaha ma'tani' he 'aen umneo goah tar a'tea fenis. Karu tataib kau tok amatufus, au ka 'tuuf fa anin, mes au 'tuuf u'toom. ²⁷ Au 'moe' are' saa'-saa' 'ok ma'tani', ma au 'ator au aok ii fani-fani he au 'bisa 'tahan piut. Fin ka reko fa karu au utoon 'eu tuaf bian anmatoom nok Uisneno, mes au kuuk a'tanhai atoran, rarit Uisneno napoin kau na'ko 'ba'et.

✧ **9:21** Nai' Mateos 22:34-40, Nai' Markus 12:28-34, Nai' Lukas 10:25-28, 1 Korintus 13:1-8

10

Ampaant om mu'ko baer fuat ein!

¹ Aok bian manekat arki! Hi kais amnikan main re' reta' un-unu', re' oras hit be'i-na'i sin anbin baer ruman. Uisneno naruru' ma nakrira' ranan neu sin ok-oke', anpaek nope re' nsanu nbi sin humak ma maatk ein. Rarit In nbatis oe tasi, onaim annao naat sin npe'on naan tar antean sin npoin anbin oe tais je panin, nok mamut ma ao-mina'.^{*} ² Nope ma oe tasi naan, anjarin a'tope' neu kit. Fin hit be'i-na'i sin anpirsain neun ka'o Musa he na'naa' sin, rarit sin natuin nope naan, ma ntaman neun oe tasi nabu-buan nok ne. Naan on re' hit re' tpirsai teu Kristus, tapeni srani' msa', he naruru' ma nakrira' mnak, hit tjair Iin na, hit tneen ma tatniin Ee. ³ Hit be'i-na'i sin ok-oke' anbukaen amnahat re' Uisneno In Asmanan nabarab neu sin.^{*} ⁴ Ma sin ok-oke' nbukaen oe re' Uisneno In Asmanan nabarab neu sin. Re' sin nbukaen oe naan, anpoi ma nboor na'ko faut kou' goes re' Uisneno In Asmanan naruru' ma nakrira' neu sin. Sin nnaon neun mee jah, fatu naan anbi nain naan. Fatu naan, es re' Kristus.^{*} ⁵ Mes Uisneno ka nroim fa nok tuaf amfaun re' anmo'en tafi'-tafi'. Rarit, oras sin nnaon nfuun am natefan nbini baer ruman re' mainuan naan ate, anmui' amates amfaun anbin naan. Onaim sin ansub sin tuaf ein anbin bare mfaun.^{*}

^{*} **10:1** Anpoin na'kon Pah Masir 13:21-22, 14:22-29 ^{*} **10:3** Anpoin na'kon Pah Masir 16:35 ^{*} **10:4** Anpoin na'kon Pah Masir 17:6, Surat Sensus 20:11 ^{*} **10:5** Surat Sensus 14:29-30

6 Are' rasin naan anjarin a'tope' neu kit, he hit kais atroim he tmoe' maufinu on re' sin.✧
 7 Kais amfua on re' sin bian sin. Anbi Suur Akninu' Uisneno matu'i mnak, "Atoin Israelas sin re' ia antokon ma naah-ninun nabu-buan anbin bijae aan maruna' in human ma in matan. Rarit sin anmurai na'besan amsa'."✧
 8 Hit kais atmakoin tok bifee re' hit ka fee ja fa, ai' tok atoni' re' hit ka moen ja fa. Fin neno naan, sin na'haek ein tafi'-tafi' on re' naan, onaim anmui' naan tuaf nifun bo' nua mteun anmaten neno mees' aah.✧ 9 Hit kais atsoba' he tmoe' rais maufinu huma'-huma' fe', taim ranan he tahiin tak, Kristus he nhukun kit, ai' kaah. Fin atoin Israelas bian he nsoba' Uisneno on re' naan, rarit In nkonan kauna' mfa-faun re' nmu'in raso, he nrau na'maet sin.✧ 10 Hit kais ta'mua' amsa'. Fin bian sin na'mua' ein piut, rarit Uisneno nreek he In ameput tuaf es na'ko sonaf neno tunan na'maet sin.✧

11 Rasi naan antoom neu atoin Israelas sin, he njari 'tope' neu kit. Sin ntui nrair sin ok-oke', he hit bisa tanoni' he kais atmoe' tatau sin saant ein. Fin neon amsoput naan anpaumak-maak he neem een.

12 Mumnau, he! Oras ia ho mutenab mak, ho bisa mtahan ma'tani'. Mes ho ro he mpaant om, he ho kais ammouf. 13 Ansuun oras, karu ho mnaben mak he mmoe' maufinu, mumnau mak, tuaf bian annaben niit furit on naan amsa'. Mes ho bisa mpirsai Uisneno mak, In nmoe' natuin In uaban kuun. Fin In ka nkonan

✧ **10:6** Surat Sensus 11:4 ✧ **10:7** Anpoin na'kon Pah Masir 32:6 ✧ **10:8** Surat Sensus 25:1-18 ✧ **10:9** Surat Sensus 21:5-6 ✧ **10:10** Surat Sensus 16:41-49

ko fa he mupein furit anneis na'ko ho 'be'im. Ansuun oras re' ho mupein furit on re' naan, In nfee ko raan a'po'i. In nroim he nmoe' ko mtahan mu'bei', he ho kais ammouf.

¹⁴ Onaim aok-bian manekat arki! Karu nmui' tuaf na'seke' ki, he mi'bees ma mi'ruri' meu baer fuat ein, maen mi'roo mi'ko naan! Kais ampao mtein!

¹⁵ Au u'uab 'eu ki re' mitenab ate, ammanoe. Maut he hi mitaib kiim, he mihiin saa' re' au u'uab ee naan, batuur. ¹⁶ Mitenab miit rasi re' ia: karu hit tabua ma tbukae tbi Uisneno In mei, rarit tait i'kraas ma ttoit makasi teu Ne, rarit hit tbukae ta'ko kraas naan, in sairt ii nak, hit tmafuut tok Kristus. Oras In n'opa' In naa' ee he nmaet, naan nahuum on re' hit tmaet tok Ne msa'. Karu hit tteib utunu', rarit hit tbukae, in sairt ii huma' mese', es re' hit tmafuut tok Kristus. Onaim oras In nmaet, naan nahuum on re' hit tmaet tok Ne msa'.^{*} ¹⁷ Hit arkit tait nama' ta'ko utunu' fua' mese'. Onaim are' tuaf-tuaf re' nait nama' na'ko utunu' fua' mese' naan, nahuum on re' hit tmafuut tok aof mese', maski hit arkit tuaf amfaun. ¹⁸ Mitenab miit pah Isra'el sin ununu' fe'. Oras sin nroor mu'it anbin mei fuat he na'besan neun Uisneno, a'naak pirsait re' arorot naan, es re' neuk in sisi. In sairt ii nak, sin anmafuut nok Uisneno, ma sin anmafuut nok atoni' re' neik mu'it naan amsa' he njair fuat.^{*}

¹⁹⁻²⁰ Au sairt ii, on mee? Oras atoni' re' ka nahiin fa Uisneno he nfee fua'-turu' neu

^{*} **10:16** Nai' Mateos 26:27-28, Nai' Markus 14:22-24, Nai' Lukas 22:19-20 ^{*} **10:18** A'naak Rais Pirsait ein sin Atoran 7:6

sin baer fuat ein, naan ka ma'osa' fa saa'-saa', ai'? Fin baer fuat ein naan, suma faut maruna' re' ka nmonin fa! Kaah fa, tua! Au sairt ii on nai: oras tuaf anroor mu'it he njair fua'-turu' neu sin baer fuat ein, sin na'besan neu niut reu'f ein. Mes sin ka na'besan fa neun Uisneno re' batuur. Onaim au ka 'roim fa he hi mmafuut mok niut reu'f ein on naan. ✧ ²¹ Karu hi mmafuut mok Uisneno, rarit ambukae mi'ko kraas naan ambi Uisneno In mei, hi ka bole fa mnao mseor gom mok niut reu'f ein, ma mbukae mi'ko sin akraas re' oras atoni' na'besan neu sin. Fin in sairt ii nak, hi mmafuut umrair mok niut reu'f ein. On naan amsa', karu hi mbukae mbi Uisneno In mei, hi ka bole fa he mbukae nbi sin mei nggoe msa'. Fin in sairt ii nak, hi mmafuut mok niut reu'f ein! Naan mono! ²² Hi mitenab on mee? He mmoe' hit Usi' natiun, ai'? Naan hit he tmaet een! Of oni' hi mitenab mak, hi ma'tani' mneis mi'ko Uisneno, ai'? ✧

Ammoe' are' saa' ii he mait mi'rat-ratan Uisneno In kanan

²³ Of oni' hi mak, "Au he 'moe' saa' aha te, bole. Fin au hak 'aan es re' naan." Batuur. Mes mimnau joo, fin are' kanan rasi, ka reko fa neu ko. Ma ka neu fa he are' kanan rasi, bisa nturun he nha'tain ho nekam. ✧ ²⁴ Kais suma maim upan ma pa'e meu ho tuam aan kuum. Reko nneis, maim upan ma pa'e meu bian amsa'.

²⁵ Onaim au 'usul on nai: karu msoos sisi mbi masa' te, mbukae, tua. Kais ammaktan an amtein mak, "Ia siis fuat, aa oo?" Ai' kais

✧ **10:19-20** Surat re' Nareta' Nafani' Raan A'honis 32:17

✧ **10:22** Surat re' Nareta' Nafani' Raan A'honis 32:21

✧ **10:23** 1 Korintus 6:12

mitenab am mak, "Au bole 'euk sisi re' ia, ai' kaah?" ²⁶ Fin anbi Uisneno In Suur Akninu' matu'i mnak, "Pah-pinan ma in aafk ein ok-oke', hit Usi' Iin na."☆

²⁷ Karu anmui' atoni' re' ka npirsai fa fe' neu Uisneno nak, "Au uskau he mbukae meu au umi!" Karu hi mroim, mnao he mbukae, tua. Ma mbukae are' saa' ii re' sin nfee sin neu ki. Kais ammaktan an mak, "Au bisa uah re' ia, ai' kaah?" ²⁸ (Mes karu anmui' tuaf re' na'se'-se'o mnak, "Kais ambukae re' ia, fin re' ia, siis fuat," reko nneis ho kais ambukae. Ho ro he mutenab meu tuaf re' neem natoon ko naan, in naben ma'fena', ai' kaah? ²⁹ Au sairt ii, mutenab murek-reko', mutuin atoni' naan in tenab, bole mbukae, ai' kaah. Kais suma mutenab rais reko mutuin ho tuam aan kuum.)

Te kaah, au bole 'moe' utuin au 'roimk ii kuuk. Mes karu bian natenab nak naan ka reko fa karu in nmoe' rais jes, nansaa' am es au ka bisa 'bebas fa he 'moe' utuin au roimk ii kuuk, suma natuin rasi naan ka reko fa neu tuaf naan? ³⁰ Karu au 'toit makasi 'eu Uisneno, rarit au 'bukae, nansaa' am es tuaf na'uab namouf kau on naan, tua?

³¹ Onaim karu hi he miah, ai' miun, ai' mmoe' saa' aha te, mmoe' are' kanan rasin naan he mtuna' ma mi'ratan Uisneno In kanan arekot. ³² Kais misusab atoin Yahudis, ai' atoin ka Yahudis fa, ai' Uisneno Iin na. ³³ Ammoe' on re' au. Fin au 'soba' he 'harineb sin arsin anbi are' kanan rasi. Au ka 'soba' fa he 'moe' rais reko 'eu au tuak ii kuuk. Mes au 'soba' he 'moe' rais reko 'eu sin arsin, he sin napenin rais fetin amsa'.

☆ **10:26** Siit Pures-Bo'is sin 24:1

11

¹ Hi mait i'tope' mi'ko kau, ma mmoe' mituin au 'monik. Fin au 'ait i'tope' u'ko Kristus, ma 'moe' utuin Ee, tua.*

Karu m'ibadat ate, bifee-atoni' ro he naruru' ma nakrira' hormaat natuin haart ii in romin

² Au 'aikas ki, natuin maski on mee msa', hi mimnau kau piut. Ma are' kanan rasi re' au unoni' 'rair ki sin, hi fe' mmoe' mituin sin. Reok re'uf! ³ Mes anmui' rais jes re' au he umnaub ki, on nai: kais amnikan hi mi'uu mi'ko mee. Ansuun tuaf re' npirsai Kristus, na'uu ma na'baa' na'ko Kristus, ma Kristus anjair in a'nakaf. Atoin ii anjair ahunut ma araip ranan neu in fee. Ma Kristus neem na'ko Uisneno.*

⁴ Atoni' kais ankuub in a'nakan oras in n'onen, ai' oras in natoon Uisneno. In haan beno. Fin naan on re' in namaeba' Kristus, natuin in ka nfee fa rais hormaat on re' biasa hit tmo'e. ⁵ Mes bifee ji ro he nkuub in a'nakan oras in n'onen, ai' oras in natoon Uisneno. In haan beno. Fin karu kaah fa te, naan on re' in namaeba' in mone, natuin in ka nfee fa rais hormaat on re' biasa hit tmo'e. Ma in namaeba' in tuan aa kuun, on re' karu bifee jes nkeu boko. ⁶ Fin karu nmui' bifee re' ka nroim fa he nkuub in a'nakan he njair tanar nak, in nfee hormaat neu in mone, reko nneis in kateir na'paran in a'naak fuun ein. Mes karu

* **11:1** 1 Korintus 4:16, Filipi 3:17 * **11:3** Ahinit-amanoet uab Yunani sin nak, *kefale* "a'nakaf" in a'moufn ii, esan re' 1) aof ii in a'nakan, ma 2) uuf. Mes anbi uab Yunani, *kefale* in a'moufn ii ka nak fa "tuaf re' naprenat".

in nnaben nak in a'naak boko naan namaeb in tuan aa kuun, reko nneis in nkuub in a'nakan naan.

⁷ Mitenab miit on nai: atoni' ka nperluu fa he nkuub in a'nakan, fin Uisneno nmoe' atoni' natuin In human ma In masan. Es naan ate, atoin ii ro he naruru' ma nakrira' Uisneno In pinan ma krahan. Ma bifee ji ro he naruru' ma nakrira' atoin ii in pinan ma krahan. ✧ ⁸ Fin oras Uisneno nmoe' pah-pinan ia, In ka nmoe' fa atoni' na'ko bifee. Mes In nmoe' bifee na'ko atoni'. ⁹ Ma In ka nmoe' fa atoni' neu bifee. Mes In nmoe' bifee neu atoni'. ✧ ¹⁰ Onaim reko nneis bifee ji nkuub in a'nakan, he tuaf bian nahiin nak, in anpaek in hak he n'onen ma natoon Uisneno In haan beno, natuin ranan re' batuur. Ameput sonaf neno tunan nahinin on naan amsa'. ¹¹ Mes karu sin nmafutun nok Uisneno, bifee ma atoni' ka nhaken nmees-mesen fa. ¹² Nahunu te, Uisneno nmoe' bifee na'ko atoni'. Mes namuni te, bifee ji es re' nahoni' naan atoni'. Ma Uisneno es re' anmoe' are' saa'-saa' ii he njarin.

¹³ Hi mitenab miit! Karu bifee ji n'onen neu Uisneno, ma ka nkuub fa in a'nakan, mituin hi teenb ii te, naan reko, ai' kaah? ¹⁴ Natuin hi atoran harat anbi kota Korintus, karu atoin ii in a'naak fuun ein amnaun ein, naan namaeb ee, oo, ai' kaah? ¹⁵ Mes karu bifee ji in a'naak fuun ein amnaun ein, naan reok re'uf, aa oo? Uisneno nfee ne a'naak funu' mnanu' he nkuub naan in a'nakan. Naan es re' batuur.

¹⁶ Mes karu anmui' tuaf re' anmatoen piut anmatoom nok rasi ia, mimnau he, fin na'ko

✧ **11:7** Reta' Ahun-hunut 1:26-27 ✧ **11:9** Reta' Ahun-hunut 2:18-19

hit re' atjair a'nakat, ma na'ko jemaa't ein, hit biasa es re' ia nai, tua.

Kais ammoe' tafi'-tafi' karu mbukae mbi Uisneno In mei

¹⁷ Oras ia, au he u'uab rais jes antein. Anbi rasi re' ia, au ka bisa 'bo'is ki fa. Fin oras hi mibua, hi ka mmoe' mituin fa saa' re' batuur, mes hi mi'baba' amre'ut amteni'.

¹⁸ Nahunu te, au 'neen nak, oras hi mibua he m'ibadat, hi mbaits om. Bian na'ko re' au 'neen sin naan, ro tebes of batuur. ¹⁹ (Ro batuur, natuin hi pukan-pukan on re' naan, of mamnita' sekau es re' batuur-batuur anneen neu hit Usi', ma sekau es re' ka nneen Ee fa.)

²⁰ Fin oras hi atoin asranit mibua ma mbukae mbi Uisneno In mei, hi ro he mimnau Usif Yesus. Naan es re' batuur. Mes hi ka mmoe' fa on naan. ²¹ In bukti esan re': oras hi mtook ma mbukae mibua te, anmui' tuaf re' ka npao fa tuaf bian, anmui' aparur' ma akomat, ma bian antein ninun raur mafu. Tar antea tuaf bian ka napenin fa nama', ma sin namnahan. ²² On mee es re' ia!? Hi ka mmui' kiim fa umi he mbukae ambi naan, aa oo? Ai' hi sairt ii he mireu' Uisneno In jemaa't ein sin kaan foo meni'? Ai' hi he mimaeba' ama'mui't ein? Hi mroim he au u'uab on mee? Mroim he au 'bo'is ki 'bi rasi re' ia, oo? Ka neu fa, tua!

Utunu' ma tua min-kase naan, anjair tanar he tamnaub hit Usi' Yesus In a'maten

(Nai' Mateos 26:26-29, Nai' Markus 14:22-25, Nai' Lukas 22:14-20)

²³ Usif Yesus kuun es re' neikn On natoon nain kau rasi re' ia, ma au 'nona' 'tein 'eu ki. Nak, oras too mfaun ii nabaarb ein he na'maet Je, mabe' naan In nait utunu' fua'

es. ²⁴ Rarit In n'onen ma ntoit makasi neu Uisneno. Ma In natoon neu In atoup noin' ein am nak, "Ambukae utunu' re' ia, fin re' ia, Au aok. Sin of nareu' Au aok ii neu ki. Onaim hi ro he mbukae utunu' re' ia he mimnau Kau."

²⁵ Oras sin nbukaen nrarin, In nmoe' huma' mese' nok akraa tua min-kase msa' am nak, "Tua min-kase re' ia in a'moufn ii, es re': Uisneno he nahake' rais manba'an fe'u nok ki. Ma Au ro he 'opa' Au naa' ii tar antea Au 'maet fe', na' rais manba'an naan anjair. Rarit, ansuun oras hi mbukae tua min-kase on nai te, hi ro he mimnau Au rasi 'maten naan."✧

²⁶ Ansuun oras, oras hi mmoe' harat re' ia, he mbukae utunu' re' ia, ma mbukae mi'ko kraas re' ia, tar antea Usi' ankoen On anfain neem, naan nahuum on re' hi mireta' mifani' anmatoom nok In a'maten.

Karu ho neekm aan ka namnoon fa, kais ambukae mbi Uisneno In mei

²⁷ On naan ate, karu nmui' tuaf re' nbukae utunu' re' naan ma nbukae na'ko kraas re' naan he namnau hit Usi', mes in neekn ee ka namnoon fa, Uisneno of anhuukn ee. Natuin, re' naan Usif Yesus In aon ma In naa'. Onaim karu tuaf es in neekn ee ka namnoon fa, in ka pantas fa he nbukae nbi mei naan, fin 'mo'et re' naan anhai'niis kuun Usif Yesus. ²⁸ Reko nneis, tuaf mese'-mese' anparikas kuun in neekn ee fe'. Rarit, karu in tebes nak in neekn ee namnoon, na' in bisa nbukae utunu' ma tua min-kase naan. ²⁹ Mes anmui' tuaf re' nbukae nok neek apenut. Fin sin nateenb ein am nak, "Nai' Yesus In a'maten, ka ma'osa' fa saa'-saa'. Nai' Yesus In aon ka ma'pake' fa neu kau."

✧ **11:25** Anpoin na'kon Pah Masir 24:6-8, Nai' Yeremias 31:31-34

Tuaf on re' naan nasaah ma nataah kuun in amre'un, natuin sin of napenin hukun. ³⁰ Etun anbi hi sonam ma hi tnaanm ein naan, anmui' tuaf re' an'oer, anmui' tuaf re' nameen, ma nmui' tuaf re' anmate nrarin.

³¹ Mes karu hit tuaf mese'-mese' atparikas tarek-reko' hit neek ii fe'e te, hit ka tapein fa hukun on re' naan. ³² Karu hit Usi' anhukun kit, In nmoe' on re' naan he nanoni' kit tatuin ranan re' namneo ma namnoon. Fin In ka nroim fa he hit tapein hukun, ma tamreu' tabubua tok mansian ii ok-oke' atbi pah-pinan ia.

³³ Onaim aok-bian manekat arki! Karu hi mibua ma mbukae mbi Uisneno In mei, es ro he mpao es. ³⁴ Karu nmui' tuaf re' namnaah anmaet, reko nneis in nha'tain naan anbi in uim je fe'. Maut he, oras hi mibua ok-oke' te, hi kais mipein hukun.

Anmatoom nok rasi bian re' hi mitaan sin naan, of au 'uum a'tea naan ate, na' au 'ator.

12

Uisneno In Asmanan anfee kit kuasa he tmeup huma'-huma'

¹ Aok-bian manekat arki! Au 'roim he hi mihiin anmatoom nok kuasat ma manoeff ein re' Uisneno In Asmaan ee nfee sin neu kit he hit tpaek sin. ² Hi mihini mrair mak, oras hi ka mjair Uisneno lin na fa fe', hi mi'besan piut meu baer maruna' re' anmuu. Hi mitun-tuin ahaa sin. ³ Es naan ate, au 'roim he hi mihiin am mak, ka neu fa tuaf re' anmafuit nok Uisneno In Asmaan Akninu' re' nak, "Kasat neu Yesus naan!" Ma ka neu fa tuaf re' ka nmafuit fa nok Uisneno In Asmaan Akninu' nak, "Nai' Yesus naan, au Usi'!"

⁴ Uisneno In Asmanan anfee neu tuaf mese'-mese' nok in mahinif ma manoef kuun, he es-es ate nanaob kuuk sin mepu. Mes are' mahinif ma manoef sin neman na'kon Asmanaf mese'. ⁵ Tuaf mese'-mese' napenin mahinif ma manoef huma'-huma' he ntuthae tuaf bian, mes sin arsin suma nneen ma natniin na'kon Usif mees' aah. ⁶ Tuaf mese'-mese' napenin mepu huma'-huma' he nanaob Uisneno In mepu, mes suma Uisneno mese' re' naan, es re' anturun ma nbaab sin he nanaob sin mepun naan. ⁷ Uisneno naruru' ma nakrira' In Asmanan anbi tuaf mese'-mese' nok ranan huma'-huma', mes In sairt ii he sin ok-oke' napenin upan ma pa'e bu'-bua'. ⁸ In nfee In Asmaan ee In kuasa neu lin na. Bian antoupun mahinif ma manoef he sin bisa nateenb ein namnuut, rarit anfee fainekat re' natai nok rasi. Bian antoupun mahinif ma manoef he natoon namnoon goah saa' re' sin nahiin sin. ⁹ Bian antein antoupun kuasa he npirsai naheran neun Uisneno, natuin sin nmafutun naher-heran nok In Asmanan. Bian antein antoupun kuasa he nareko' amenat. ¹⁰ Bian atein antoupun kuasa he nmo'en rais sanmakat huma'-huma' re' naruru' ma nakrira' Uisneno In pinan ma krahan. Bian antein antoupun mahinif ma manoef he natoon Uisneno In haan beno neu lin na. Bian antein antoupun mahinif ma manoef he nahinin smanaf mee es re' na'uu ma na'baa' anbi Uisneno, ma mee es re' kahaf. Bian antein antoupun mahinif ma manoef he bisa na'uab ein anpaken uab huma'-huma'. Bian antein antoupun mahinif ma manoef he natoon uab ein naan sin a'moufk ein. ¹¹ Mes suma Asmanaf mese' re' nmoe' he

sin arsin bisa nmepun on re' naan. In nfee neu tuaf mese'-mese' he sin bisa nmepun natuin Asmanaf naan In romin.✧

Aof mese', nok in nama' huma'-huma'

¹² Au he utaib mahinif ma manoef sin re' naan nok aof. Aof mese' naan nok in nama' huma'-huma'. Mes nama' huma'-huma' naan, anmafuut anjair aof mese'.

Naan on re' Kristus Iin na.✧ ¹³ Hit arkit tmafuut tok Asmanaf mese'. Es naan ate, oras hit tasrain, hit tjair on re' pah mese'. Maski hit atoin Yahudis ai' ka atoin Yahudis fa, ate ai' ka ate fa, Uisneno nfee neu kit arkit Asmanaf mees' aah. Naan on re' hit tbukae oe re' neiki 'honis na'ko oe mata' mese'.

¹⁴ Batuur, aof ii ka na'ko fa nama' mese'. Fin in re' naan, anjair na'ko nama' amfaun. ¹⁵ Kar-karu ho haem aan nak, "Au re' ia, ka 'nimaf fa. Onaim au ka 'jair fa nama' es u'ko ho aom." Maski in na'uab on naan, mes in fe' njair nama' na'ko ho aom. Batuur, ai'? ¹⁶ Ma karu ho ruikm aan nak, "Au re' ia, ka mataf fa. Onaim au ka 'jair fa nama' u'ko ho aom." Maski in na'uab on naan, mes in fe' njair nama' na'ko ho aom. ¹⁷ Mitenab miit! Karu ho aom aan suma njair mataf mees' aah, ho bisa mneen on mee? Ma karu ho aom aan suma njair rukif mees' aah, ho bisa mufoi on mee?

¹⁸ Mes hi mihiin mak, Uisneno nmoe' kit atjair on re' aof mese', ma In n'ator in nama' huma'-huma', natuin In human ma In masan. ¹⁹ Karu hit aok ii suma njair nama' huma' mees' aah, in kaan ee ka 'aof' fa ntein, oo? ²⁰ Mes in

✧ **12:11** Roma 12:6-8 ✧ **12:12** Roma 12:4-5

batuurn ii, hit aok ii nmui' nama' huma'-huma'.
Naan es re' anmoe' je njair aof a'teme-'teme.

²¹ Atoni' in matan ka bisa nasmeru' ma nkana'paar fa neu atoni' naan in a'niman nak, "Au ka 'perluu ko fa!" Ma atoni' in a'nakan ka bisa natoon fa neu in haen am nak, "Au ka 'perluu ko fa!" ²² In batuurn ii, es re' aof ii anmui' nama' re' hit taan ee an'oer ma ka pentiing fa, mes hit tperluu sin fe'. ²³ Anmui' nama' bian re' hit taan sin suma mapake' kreo' goah, mes hit tpijaar ma tpairoir sin fe' nok reko. Ma nmui' nama' bian re' hit tamaeb ok, ma ka troim fa he takrira' sin, rarit hit tkuub ma t'aum sin nok reko. ²⁴ Mes karu nama' re' ka namaeba' kit fa, hit ka tansaa' sin fa.

Mes Uisneno nabuab naam' ein naan anjair aof mese'. Rarit In n'ator he naam' ein re' hit taan sin ka pentiing fa, hit tpijaar ma tpairoir sin nok reko, ²⁵ fin In ka nroim fa karu hit aok ii nbait on. In nroim he hit arkit atmakius es nok es. ²⁶ Fin karu naam' es napein susat, sin arsin annaeb ein amsa'. Ma karu naam' es napein hormaat, sin arsin anmarinan amsa'.

²⁷ On naan amsa' hi arki. Fin hi on re' Kristus In aon a'teme-'teme. Ansuun tuaf apirsait es-es ate, anjair on re' naam' es na'ko Kristus In aon. ²⁸ Fin anbi apirsait ein sin atnaank ein, Uisneno nfee kuasa he nmepun huma'-huma'.

Nahunu te, In nreek haef tuaf bian he nnao natoon In haan beno.

No nuan ii, In npaek tuaf bian anjair In mafefa kninu'.

No teun ii, In nmoe' tuaf bian nanoni' nahiin tuaf anmatoom nok Ne.

Rarit In nfee kuasa neu tuaf bian he bisa nmoe' rais sanmakat huma'-huma', he naruru' ma nakrira' In pinan ma krahan.

Bian napenin kuasa he nareko' amenat.

Bian napenin mahinif ma manoef he ntu-run ma nbaab tuaf.

Bian napenin mahinif ma manoef he bisa na'haba' ma n'urus tuaf ein he sin nmepun nabu-buan nok reko.

Ma In nfee kuasa neu tuaf bian antein, he sin bisa na'uab ein anpaken uab huma'-huma'.[☆]

²⁹ Hi mitenab on mee? Uisneno nreek kit arkit he tnao tatoon In haan beno, oo? Kaah fa, tua. In nmoe' kit arkit atjair In mafefa kniun, aa oo? Kaah fa, tua. In nmoe' kit arkit atjair anoni' ahinit, aa oo? Kaah fa, tua. In nfee kuasa neu kit arkit he tmoe' rais sanmakat, aa oo? Kaah fa, tua. ³⁰ In nfee kuasa neu kit arkit he bisa tareko' ameent ein, aa oo? Kaah fa, tua. In nmoe' kit arkit he bisa ta'uab atpaek uab huma'-huma', oo? Kaah fa, tua. In nmoe' kit arkit bisa tahiin uab ein naan sin a'moufk ein, aa oo? Kaah fa, tua.

³¹ Hi ro he mibarab he mtoup ma mpaek mahinif ma manoef re' mapake' nneis neu too mfaun ein.

Maski on naan amsa', mes au fe' he ururu' ma ukrira' 'eu ki ranan re' reko nneis.

13

Rais manekat re' batuur

¹ Kar-karu au bisa u'uab a'paek are' kanan uab, on re' uab mansian, ai' uab na'ko Uisneno In ameupt ein na'kon sonaf neno tunan, mes

[☆] **12:28** Efesus 4:11

au ka 'mui' fa rais menakat a'kre'o msa', in uupn ii saa'? Au uabak naan ruumn ahaa, on re' 'sene re' nahan-haan aah, ai' daroom re' nahaan tang-tang-tang aah. ² Kar-karu au 'mui' mahinif ma manoef he utoon Uisneno In haan beno neu lin na, ma au uhiin 'ain are' rais ma'niif ein ok-oke', ma au uhiin are' kanan rasi re' ahiint ein nahiin sin, ma karu au rais pirsait 'eu Uisneon gui na'kii' tar antea au bisa unani' 'toe'f ein, mes au ka 'mui' fa rais manekat a'kre'o msa', in uupn ii saa'? Au 'mo'et naan ka ma'osa' ma ma'upan fa saa'-saa'.[☆] ³ Karu au u'sosa' 'ain au 'mui'f ein, rarit au 'fee roit ein ok-oke' 'eu tuaf ama'mui't ein, ai' au 'nona' au tuak ii a'jair fua'-turu',* mes au ka 'mui' fa rais manekat a'kre'o msa', in uupn ii saa'? Au ka 'mui' fa rasi 'sukif he 'aikas au tuak ii msa'. Fin re' naan parsuum aah! Ka nmui' fa upan ma pa'e kre'o msa'.

⁴ Fin rais manekat naan, namiin, tua.

Rais manekat naan, sabaar, tua.

Rais manekat naan, ka natiun nahiin fa, tua.

Rais manekat naan, ka naikas ma na'ratan nahiin fa in tuan aa, tua.

Rais manekat naan, ka nabeo' fa, tua.

⁵ Rais manekat naan, naruru' rais hormaat, tua.

Rais manekat naan, ka nroim fa he niis anmees kuun, tua.

Rais manekat naan, ka manah fa te natoo', tua.

Rais manekat naan, ka natunu' nahiin fa

☆ **13:2** Nai' Mateos 17:20, 21:21, Nai' Markus 11:23 * **13:3** Anmui' tuis uab Yunani bian re' ntui ntein' ein am nak, "a'nona' au aok ii a'jair fua'-turu'".

tenab, tua.

⁶ Rais manekat naan, anmariin nok saa' re' namneo ma namnoon,

ma ka nroim fa rasi re' ka natai fa, tua.

⁷ Rais manekat naan, naran ma ntahan anbi are' kanan rasi, tua.

Rais manekat naan, anpirsai piut, tua.

Rais manekat naan, nafnekan ma nharap piut, tua.

Rais manekat naan, naran ma ntahan piut, tua.

⁸ Rais manekat naan ka nasnaas fa, tua.

Mes saa' re' Uisneno In mafefa kniun' ein natoon sin naan, noki-noki te, ka tperluu ttein sin fa goen. Ma karu tuaf na'uab anpaek uab huma'-huma', noki-noki te, ka tperluu ttein sin fa goen. Ma karu saa' re' ahiint ein nahiin sin, noki-noki te, ka mapake' fa goen amsa'. ⁹ Oras ia, hit suma tahini kre'o' goah. Karu hit tjair Uisneno In mafefa kninu', hit suma tatoon rasi re' ka nanokab fa fe'. ¹⁰ Mes antea in oors ate, are' saa' ii of namtiis. Oras naan, rasin re' ka namtiis fa fe', ka mapake' fa ntein amsa'.

¹¹ Tait i'tope' on nai: oras au ana' fe', au u'uab on re' ri'aan a'baut biasa na'uab. Au utenab on re' ri'aan a'baut biasa natenab amsa'. Mes oras ia, au 'neek amnasi 'rair, es naan ate, au ka 'riis nok fa on re' ri'aan aan antein.

¹² Tait i'tope' bian antein: oras ia, hit bisa tiit a'kre'o, mes ka nakninu' fa fe', on re' atkisu tpaek ninu re' anreu'. Mes a'roo-'roo te, are' saa' ii of nakninu'. Hit tkius tiit on re' baer es natetab anbi hit humak ma hit matak. Oras ia, au suma uhini kre'o' goah. Mes a'roo-'roo te,

au bisa uhiin are' kanan rasi, on re' Uisneno nahiin are' kanan rasi anmatoom nok au tuak.

¹³ Onaim oras ia, anmui' rasi nono' teun re' hit ro he tmoe' sin, re' ntaahn ein piut. Sin esan re':

hit ro he tpirsai piut teu Uisneno;

hit ro he tafnekan ma tharap piut tak, In of an'ator are' kanan rasi anjarin reko; ma hit ro he tmaneek es nok es piut-piut.

Na'ko rais noon teun ein ia, re' pentiing anneis ji es re' *rais manekat*. Fin rais manekat naan es re' reko nneisi.

14

Uisneno In Asmaan ee nfee mepu huma'-huma' neu Iin na

¹ Am'usaha he mmaneek es nok es ambi are' kanan rasi. Fin ka nmui' fa rasi bian re' pentiing anneisi ntein. Ma maim ranan amsa' he Uisneno In Asmaan ee anfee ki kuasa nok mahinif ma manoef, he hi bisa mmoe' rais arekot huma'-huma'. Ma re' reok gui, karu hi mipein mahinif ma manoef he mitoon Uisneno In haan beno. ² Fin, karu tuaf anmui' mahinif ma manoef he na'uab anpaek uab a'teta', Uisneno In Asmaan ee anfee ne kuasa he natoon rasin re' ka nakninu' fa fe'. Mes in ka na'uab fa nok tuaf bian, fin in suma na'uab nok Uisneon goah. Ka nmui' fa tuaf re' nabua nbi naan, re' nahiin tuaf naan in uab naan. ³ Mes karu tuaf anmui' mahinif ma manoef he natoon Uisneno In haan beno, in nfee haan beno naan neu tuaf ein ok-oke' re' abitan naan. In nahake' tuaf-tuaf in rais pirsait neu Uisneno, nha'tain sin neek ein, nseu'saab ma nhaan mau tuaf ein re' neek

ein ansusan. ⁴ Tuaf re' na'uab anpaek uab a'teta', in nha'tain kuun in nekan. Mes atoni' re' natoon Uisneno In haan beno, in nha'tain too mfaun re' nabuan, he jemaa't ein ok-oke' na'be'i nnesin.

⁵ Au roimk ii he hi arki bisa mi'uab ampaek uab a'teta'. Mes au 'romi 'neis he hi bisa mi'uab mitoon Uisneno In haan beno. Fin tuaf re' natoon Uisneno In haan beno, mapake' nneis na'ko tuaf re' suma na'uab anpaek uab a'teta'. Karu mi'uab ampaek uab a'teta', naan reko amsa', asar anmui' tuaf re' bisa natoon uab naan in a'moufun. Nok ranan naan, haan beno naan bisa na'be'ib too mfaun ein abitan jema'at, he sin bisa nahinin imsa'.

⁶ Aok-bian manekat arki! Mitenab miit rasi ia. Kar-karu au 'uum 'eu ki, rarit au u'uab a'paek uab a'teta' re' hi ka mihiin je fa, hi mipein upan saa'? Ka tiit fa, tua. Mes karu au u'uab 'eu ki, reko nneis au utoon Uisneno In romin. Reko nneis au 'fei rasi re' unu' te, ka nakninu' fa. Reko nneis au 'turun ma 'baab ki he mihiin rasi huma'-huma' antea namnuut. Reko nneis au umnauba' ki 'eik Uisneno In Kabin ma Prenat. Reko nneis au unoni' ki. Nok ranan naan ate, na' anmui' in upan neu ki, tua!

⁷ On naan amsa' nok baer musiik ein. Fin sin ka nmonin fa, mes sin nahanan hanaf huma'-huma'. Ampaek bobbe, ai' 'he'o, ai' 'reku', karu in not ee ka na'bani' fa, atoni' ro ka nahiin fa neu in nreuk siit mee ja, oo? ⁸ Ma karu toi's ee haan ee ka nakninu' fa, on mee he soraurs ein bisa nahinin nak, in haan tanar he sin nabaarb ein he nmakenan? Ka bisa fa, tua. ⁹ On naan amsa' neu ki. Karu hi mi'uab ampaek uab a'teta', ai' mpaek uab re' atoni ka nahiin je

fa ma nkeukn ee, naan on re' hi mi'uab mok anin. Ruum am parsum aah, fin atoni' ka bisa nheek fa ho sarit! ¹⁰ Anmui' uab amfaun anbi pah-pinan ia. Uab mese'-mese' te, anmui' kuun in a'moufun. ¹¹ Mes karu au ka uhiin fa atoni' bian sin uab, naan ka nmui' fa upan saa'-saa' neu kau. Au ka uhiin fa sin uab, ma sin ka nahiin fa au uab amsa'. Hit arkit es nok es ate, atjair on re' kase.

¹² On naan amsa' nok ki. Hi he mipein kuasa nok mahinif ma manoef mi'ko Uisneno. Naan reko. Mes reko nneis hi m'usaha he mipein kuasa nok mahinif ma manoef re' hi bisa mpaek je he mha'tain apirsait ein amfaun!

¹³ Onaim karu tuaf re' na'uab anpaek uab a'teta', reko nneis in n'onen antoit he Uisneno nfee ne mahinif ma manoef msa' he in bisa natoon uab a'teta' naan in sarit. ¹⁴ Karu au 'onen a'paek uab a'teta', au 'onen a'paek au nekak, mes au ka uhiin fa neu au u'uab saa'. ¹⁵ Onaim in reokn ii, au he 'moe' on mee? Au 'paek sin nua sin, mes es-es ate nok in tabu. Au he 'onen a'paek au nekak. Ma au he 'onen a'paek uab re' au uhiin je msa'. Au he 'sii siit pures-bo'is 'eu Uisneno 'paek au nekak. Ma au bisa 'sii 'paek uab re' au uhiin je msa'. ¹⁶ Fin karu ho mpaek uab a'teta' he mpures ma mbo'is Uisneno mu'ko ho nekam, rarit anmui' tuaf bian anbi naan re' ka nahiin fa rasin naan, on mee he in bisa nekaf mese' nok ko? Oras ho mtoit makasi meu Uisneno mpaek uab a'teta', on mee he tuaf naan bisa nekaf mese' nok ko mnak, "Naan batuur, tua!" Ka bisa fa, ai'? Fin in ka nahiin fa ho uab naan. ¹⁷ Ho bisa mtoit

makasi meu Uisneno on naan. Mes rasi naan ka nha'tain fa tuaf bian sin neek ein.

¹⁸ Hi of oni' ka mihiin fa. Au u'uab a'paek uab a'teta' a'neis u'ko ki ok-oke'. Ma au 'toit makasi 'eu Uisneno, natuin In nmoe' kau bisa u'uab on naan. ¹⁹ Mes karu apirsait ein nabuan, reko nneis au u'uab a'paek uab tuk-tuka' ma par-para' niim aah re' he sin bisa nahinin, he au unoni' sin, naan reko nneis na'ko au u'uab amnanu'-mnanu' a'paek uab a'teta' amfa-faun, re' sin ka nahiin je fa.

²⁰ Aok-bian manekat arki! Karu hi he mroim he mihiin are' kanan rasi, hi ro he minoni' on re' tua neek amnasit. Kais mitenab on re' ri'aan a'baut ein! Mes anmatoom nok rais maufinu, hi ro he on re' ri'aan a'baut ein, re' ka nmoe' nahinin fa rais maufinu, fin sin neek ein nakniun' ein. ²¹ Anbi Uisneno In Suur Akninu', matu'i mnak:

“Hit Usi' na'uab am nak,
 ‘Au he 'paek pah re' na'uab anpaek uab
 a'teet ein,
 he Au u'uab 'eu pah Isra'el ia.

Maski Au u'uab on mee msa',
 mes sin ka nromin fa he natniin Kau,
 tua.'”[☆]

²² Natuin rasi naan, hi mkius miit kiim, karu tuaf na'uab anpaek uab a'teta', naan anjair tanar neu tuaf re' ka npirsai fa fe' neu Uisneno, he sin nkuis niit In kuasan. Naan ka nturun ma nbaab fa tuaf-tuaf re' anpirsai nrarin neun Uisneno. Mes karu tuaf natoon Uisneno In haan beno, naan anturun ma nbaab atoni' re' anpirsai nrair neu Ne. Naan ka nturun ma nbaab fa tuaf re' ka npirsai fa fe' neu Ne.

☆ **14:21** Nai' Yesaya 28:11-12

23 Karu hi mibua, rarit hi arki es-es ate ampaek uab a'teta', rarit anmui' tuaf re' ka npirsai fa, ai' tuaf re' ka nahiin fa rasin re' ia, antaam anbi hi sonam ma hi tnaanm ein, sin of nateenb ein on mee? Tebes, sin of nak, "Atoin ein ia namanun nrarin, tua!"

24 Karu hi arki, es-es ate mitoon Uisneno In haan beno, rarit anmui' tuaf re' ka npirsai fa, ai' tuaf re' ka nahiin fa rasin re' ia, antaam anbi hi sonam ma hi tnaanm ein, ro tebes tuaf naan anroim he nneen ma natniin saa' re' hi mi'uab ee. Onaim saa' re' hi mi'uab ee naan, naruru' ma nakrira' tuaf naan in saant ein, tar antea in nparikas namnuut in a'moin aa kuun.

25 Rais maufinun re' in na'nifa' sin anbin in nekan amsa', of mamnita' he too mfaun ein niit sin. Rarit tuaf naan of anri'tuu he na'besan neu Uisneno mnak, "Ro tebes, Uisneno et hi sonam ma hi tnaanm ein, tua!"

Are' kanan rasin re' hit tmoe' sin, atmoe tatuin in batur aan. Kais atmoe' tafi'-tafi'

26 Onaim aok-bian manekat arki! Karu hi mibua, tuaf mese'-mese' nok nain kuun in mahinif ma manoef. Anmui' asiit re' nsii siit pures-bo'is neu Uisneno. Anmui' anoni' re' nanoni' tuaf anmatoom nok Uisneno. Anmui' atoon rais ma'nifa' na'ko Uisneno, re' unu fe'e te ma'nifa'. Anmui' a'uab re' na'uab nok uab a'teta'. Ma nmui' tuaf re' bisa natoon uab naan in a'moufun. Are' rasin naan, sin ro he nmoe' sin he nha'tain tuaf bian sin rais pirsait.

27 Karu nmui' tuaf re' nroim he na'uab anpaek uab a'teta', naan reko. Mes maut he tuaf nua ai' teun goah ate, nanokab nai. Kais amfaun. Es na'uab anrair fe'e te, na' es na'uab antein. Ma ro he nmui' tuaf re' bisa natoon uab naan in a'moufun. 28 Karu ka nmui' fa

tuaf re' bisa natoon uab naan in a'moufun, kais mi'uab ampaek uab a'teta' ambi too mfaun ein sin humak ma sin matak. Maut he sin na'uab ein on naan anbin sin neek ein kuuk. Sin bisa na'uab nok Uisneno on naan amsa'.

²⁹ Karu hi mibua, maut he tuaf nua ai' teun goah esan re' natoon Uisneno In haan beno. Hi bian ii ro he mtai mirek-reko' sin uabk ein naan. ³⁰ Mes karu Uisneno nfei neu tuaf es, re' antook ma nneen anbi naan, he nahiin rais jes re' unu' fe'e te ma'nifa', tuaf naan ro he natoon haan beno naan neu abitan naan ok-oke'. Ma tuaf re' na'uab anhaek maat ro he nasnaas fe', he nfee mainuan neu tuaf re' fe' anneen na'ko Uisneno, he in bisa na'uab. ³¹ Amneon ii, hi arki bisa mitoon Uisneno In haan beno. Mes maut he tuaf es na'uab fe', rarit na' in partei. Nok ranan naan, hi arki bisa mneen ma mitniin, ma hi arki bisa minoni', ma hi arki bisa mnaben miit mak hi neekm ein na'be'in. ³² Mimnau, tuaf re' natoon Uisneno In haan beno, in ro he n'ator nahiin in tuan ee kuun amsa'. Tuaf es na'uab, rarit na' tuaf es, fin tuaf bian bisa ntahan in tuan ee. ³³ Fin ka tiit fa taisibu anbi Uisneno. Fin anbi Uisneno, are' saa' ii makikin ma ma'ator nok reko.

Anbi mee-mee, karu apirsait ein nabuan ate, biasa on nai: ³⁴ Biffee ngguin ro he ntokon ntainiin ein. Kais nafefan. Sin ro he nneen ma natniin neu a'naakt ein. Fin Uisneno In Atoran na'uab on naan amsa', ai'? ³⁵ Karu nmui' biffee jes re' he nataan rais jes ate, maut he nfain fe', na' nataan neu in mone. Fin karu biffee ngguin na'roton anbin uim onen, naan tamaeb ok, tua!

³⁶ Hi teenb ein on mee? Fin Uisneno In Kabin ma Prenat ka npoi ma nboor fa na'ko ki! Ma In Kabin Ma Prenat naan ka nfee je fa

neu hi abit Korintus atmees! Mitenab mirek-reko' fe'! ³⁷ Karu nmui' tuaf re' naan in tuan ee nak, in bisa natoon Uisneno In haan beno, ai' natenab nak, in ntoup kuasa na'ko Uisneno In Asmaan ee, in nahiin kuun am nak, rasi re' au 'tui' 'eu ki naan, ka atoran na'ko au kuuk fa, mes naan prenatal na'ko hit Usi', Nai' Yesus. ³⁸ Karu nmui' tuaf re' ka nroim fa he ntoup rasin re' ia, hi kais amtoup goe.

³⁹ Aok-bian manekat arki! Amhaek miheer he hi mipein kuasa he bisa mitoon Uisneno In haan beno. Ma kais ampenan tuaf am mak, sin ka bole fa he na'uab ein anpaken uab a'teta'.

⁴⁰ Onaim karu hi mibua, minaob are' kanan rasi natai nok in batuur aan, re' pantas. Rais jes nahuun fe', na' bian natuin ein. Minaob sin arsin nok reko, kais tafi'-tafi', tua.

15

Kristus anmoni nfain na'ko In a'maten

¹ Aok-bian manekat arki! Au 'roim he hi mimnau Uisneno In Rais Reko re' au utoon ki unu' naan. Hi mtoup maan Rais Reko naan, mhaek mibaar ma mituin ee piut amsa'. ² Fin Rais Reko naan, es re' bisa nsoi nafetin ki, asar hi mnaa' miheer piut meu ne. Mes karu hi ka mpirsai fa piut meu Uisneno, hi rais pirsait naan, parsuum aah.

³ Au unoni' 'rair ki are' rasi re' pentiing, re' unu' te, tuaf nanoni' niit anrair kau sin. Sin esan re': Kristus, re' Uisneno nreek Ee neem naan, anmate nrair he nsoi nafetin kit na'ko hit sanat ma penu sin, natai nok saa' re' matu'i nbi Uisneno In Suur Akninu' na'ko

unu'.[☆] 4 Rarit sin nsuub Ee. Anmeu te, Uisneno namonib nafain' Ee, natai nok saa' re' matu'i nain anbi Uisneno In Suur Akninu' na'ko unu'.[☆] 5 Rarit Kristus nakrira' In tuan ee neu nai' Petrus.* In nakrira' In tuan ee msa' neu In atoup noin' ein tuaf bo'es am nua.[☆]

6 Neot es, In nakrira' In tuan ee neu apirsait ein tuaf natun niim anneis. Sin arsin ankius niit Ee. Na'ko sin arsin re' naan, tuaf amfaun anmonin fe'. Amaets ein, sin fauk aah. 7 Rarit In nakrira' In tuan ee neu nai' Yakobus. Rarit In nakrira' In tuan ee neu In haef ein ok-oke'.

8 Au es re' amunit a'neis, a'kius 'iit Ee msa'. Fin au on re' aheit susu re' nahoins ee namuin.[☆] 9 Uisneno In haef bian sin, sin arsin pentiing anneis na'ko kau. Amneon ii, au ka pantas fa he 'jair In haef. Fin unu' te, au es re' ususab ma 'ha'mui' Uisneno In na nbin bare-bare.[☆] 10 Mes Uisneno naruru' ma nakrira' In nekan arekot neu kau. Rarit In es re' anmoe' kau 'jair on re' ia, oras ia. Oras In nmoe' rais reko neu kau, In ka nporin fa oras nok ruum am parsuum. Namuni te, au es re' a'haek ma'tani' 'neis u'ko sin arsin ok-oke'! Te kaah, Uisneno In nekan arekot es re' nmeup anbi au 'monik, mes ka au fa es re' a'meup.

11 Onaim ka pentiing fa karu au es re' unoni' tuaf, ai' haef bian sin es re' nanoni' tuaf. Fin hai arkai minoni' rasi re' huma' mese'. Hai arkai mitoon piut-piut meu tuaf anmatoom nok

[☆] 15:3 Nai' Yesaya 53:5-12 [☆] 15:4 Siit Pures-Bo'is sin 16:8-10, Nai' Mateos 12:40, Haef ein sin Reta' 2:24-32

* 15:5 Suur Akninu' uab Yunani matu'i mnak, "Kefas". Kefas naan, nai' Petrus in kanan es. [☆] 15:5 Nai' Mateos 28:16-17, Nai' Markus 16:14, Nai' Lukas 24:34,36, Nai' Yohanis 20:19

[☆] 15:8 Haef ein sin Reta' 9:3-6 [☆] 15:9 Haef ein sin Reta' 8:3

Uisneno In Rais Reko. Nok ranan naan, hi mpirsai meu Rais Reko re' naan.

Amaets ein of anmoni nfanin

¹² Hai minoni' tuaf am mak, Kristus, re' Uisneno nreek anrair Je neem naan, anmoni nfain na'ko In a'maten. Onaim nansaa' am es hi bian mak, "Amaets ein ka nmoni nfanin fa"? In a'suikn ii saa'? ¹³ Fin karu amaets ein ka nmoni nfanin fa, in sairt ii nak, Kristus ka nmoni nfain fa msa'! ¹⁴ Ma karu Kristus ka nmoni nfain fa, are' saa' re' hit biasa tatoon sin teu too mfaun ein, ka mapake' fa goen. Ma hi rais pirsait meu Ne, ruum am parsuum aah! ¹⁵⁻¹⁶ Ma karu batur amaets ein ka nmoni nfanin fa, hai mjair saksii poi anmatoom nok Uisneno. Fin hai biasa minoni' tuaf am mak, "Uisneno es re' namonib nafani' Kristus!" Ro tebes hai mitoon on re' naan. Ma karu amaets ein ka nmoni nfanin fa, in sairt ii nak, Uisneno ka namonib nafani' niit fa Kristus. ¹⁷ Mitenab miit rasi ia: karu Kristus ka nmoni nfain fa, hi rais pirsait meu Uisneno ruum am parsuum aah! Fin hi misaah hi sanat ma penu sin fe'! ¹⁸ Ka naan annees jah fa, fin amaets ein ok-oke', re' unu' fe'e te, anmafutun nok Kristus, karu Kristus ka nmoni nfain niit fa, sin nmaten ma napasib sin na'kon Uisneno msa'. ¹⁹ Hit ta'peis ok teu Kristus. In sairt ii nak, In of anmoe' rais reko neu kit. Mes karu hit tafneek on naan suma tbi pah-pinan ia goah, naan ruum am parsuum aah! Ma hit tjair atoin kasian atneis ta'ko biak ein ok-oke'!

Saa' na es re' anjair, natuin Kristus anmoni nfain?

²⁰ Te kaah, ka on fa naan, tua. Amneon ii, es re': Kristus re' Uisneno nreek Ee neem naan, anmoni nfain na'ko In a'maten! In ka nmees fa, fin apirsait ein re' nmate nrarin, of anmoni nfanin amsa'. Kristus re' naan on re' fua unu, re' naruru' ma nakrira' am nak, sin re' amaets ein naan, of anmoni nfanin natuin Ee. ²¹ Ununu' te, suma tuaf mees' aah, es re' nai' Adam, re' antanhai Uisneno In aprenat. Onaim in napein hukun, es re' rais mates. Hukun naan ansaen kit arkit ok-oke'. Mes oras ia, anmui' tuaf es antein, es re' Kristus, re' nmoin natuin Uisneno In aprenat. Onaim natuin In arekon, amaets ein bisa nmoni nfanin! ²² Ansuun tuaf re' antanhai Uisneno In aprenat, napein hukun a'maten amsa', on re' nai' Adam. On naan amsa', ansuun tuaf re' anmafuit nok Kristus, Uisneno of namonib nafani' sin.

²³ Mes es-es ate nok in tabu. Kristus anjair tuaf ahunut re' nmoni nfain, on re' fua unu fe'e na. Ma oras In nkoen On anfain neem neu pah-pinan ia, na' Iin na nmoni nfain amsa'.

²⁴ Rarit, na' pah-piin ii namsoup. Oras naan, Kristus anjair Usif re' nareu' are' kanan kuasa, are' kanan aprenat, ma are' kanan re'u re' anmamuus nok Ne. In njair Usif re' nnona' nafani' In hak aprenat neu In Amaf, es re' Uisneno.

²⁵ Fin In ro he nnaa' aprenat piut, tar antea Uisneno niis naan are' kanan saa' re' anraban Kristus, he sin na'ruir ein neu Ne. ²⁶ Anmui' rais jes anteni' re' anmamuus nok kit mansian. Es re' hit ro he tmaet. Mes namuni te, Uisneno he niis naan rasi 'maten in kuasan amsa'. In nmo'e nrair on naan ate, ka tiit fa tuaf re'

☆ **15:25** Siit Pures-Bo'is sin 110:1

nmate ntein. ²⁷ Anbi Suur Akninu' Uisneno matu'i mnak, "Uisneno nmoe' are' kanan saa' re' In niis naan sin, he na'ruir ein neu Tuaf re' In nba'an he nreek Ee neem." Oras antui mnak, "are' kanan saa' re' In niis naan sin, he na'ruir ein neu Tuaf", nakninu' nrair nak, Uisneno ka ntaam fa neu naan. Fin Uisneno kuun es re' nait Je njair Usif neu are' saa' ii ok-oke'. ²⁸ Karu of are' saa' ii nneen ma natniin batuur neu Uisneno In Anah, na' Anah naan of annona' are' saa' ii ok-oke' neu In Amaf, re' nait Je njair Usif neu are' saa' ii ok-oke'. Rarit Uisneno annaa' aprenat piut anbi are' kanan rasi, ma neu are' kanan mansian.

Kar-karu amaets ein ka nmoni nfanin fa

²⁹ Anmui' tuaf re' nasrain he nsenu' ma nseka' amates re' ka nasrain fa fe'. Mes karu amaets ein ka nmoni nfanin fa, nansaa' am es sin he nasranin neun amaets ein? ³⁰ Ma nansaa' am es hai he mibarab he mmaet fani-fani, karu amaets ein ka nmoni nfanin fa? ³¹ Fin au he noi 'maet neno-neno! Mes aok-bian manekat arki! Au 'suup, au 'naben ate ka saa'-saa' fa karu au 'maet. Fin au bisa u'aiti' au humak, natuin hi mmafuut piut mok hit Usi' Yesus Kristus, re' Uisneno nreek anrair Je neem. ³² Neno naan, oras au 'bi kota Efesus fe', au 'matoe piut 'ok atoin ein naan on re' mui' fui apisut. Mes karu au suma 'mabaan he au bisa 'iis kuuk, ka 'fee je fa 'eu Uisneno, naan ruum am parsuum aah. Ka mapake' fa, tua! Fin karu batuur amaets ein ka nmoni nfanin

✧ **15:27** Siit Pures-Bo'is sin 8:6 † **15:29** Era' re' ia ka nakninu' fa. Harat on re' "nasrain he nsenu' ma nseka' amates" ka tiit fa et era' bian anbi *Uisneno In Rais Manba'an Fe'u* ok-oke'.

fa, reko nneis hit tatun-tuin ahaa biak ein sin uab re' nak,

“Iim he hit fesat ok-oke',
 ma taah-tiun namin-miin aah,
 fin noka' te, hit atmaet, tua!”[☆]

³³ Hi kais mipein rais poi he mitenab on naan! Fin anmui' uab re' nak,

“Karu ho mhaek ha'e mese' mok amafunt ein, naan anmoe' ko mteib mu'ko raan a'honis re' namneo ma namnoon, tua.”

³⁴ Kais ammoe' rais maufinu mtein! Misnaas nai! Am'ator ho tuam aan rek-reko! Ammoe' 'moe' amneot aah! Amneon ii, hi ro he mimaeb om, fin anbi hi tnaanm ein, anmui' tuaf re' ka nahiin Uisneno fa fe'.

Karu hit tmoni tfain, of hit aok ii on mee?

³⁵ Anmui' tuaf nataan am nak, “Karu amaets ein anmoni nfanin, in raan ii on mee? Ma sin aok ein anjarin on mee?”

³⁶ Naan mono! Karu amseen fini te, fini naan ro he npunu nbi auf goe nanan, na' in bisa nmoin ma natoor. ³⁷ Ma fini re' hit tseen, in masan ka huma' mese' fa nok saa' re' natoor ma nanoo. In fini re' anmeot, on re' maak-gandum ai' maka', ai' fini bian. ³⁸ Es-es ate natuin in masan kuun, natuin Uisneno In romin. Fin In es re' nafeek roet ein sin maask ein.

³⁹ Mu'it ma mansian ii on naan amsa'. Es-es ate nok in masan, natuin Uisneno In romin. Rarit mansian ii in aon, natuin mansian in human ma in masan. Mui't ein sin aok ein, es-es ate natuin in masan. Koorn ein nok sin iin. Iik' ein nok sin iin. Bian antein nok sin iin.

[☆] **15:32** Nai' Yesaya 22:13

⁴⁰ Anmui' bare' et neon goe tnanan, ma nmui' bare' et pah-pinan. Re' abitan neon goe tnanan anmui' sin pinan ma krahan kuuk. Re' abitan pah-pinan ia amsa' anmui' sin pinan ma krahan kuuk. Mes pinan ma krahan naan a'teta' na'ko abitan neon goe tnanan.

⁴¹ Anbi neon goe tnanan, maans ee in pinan ma krahan a'teta'; funan in pinan ma krahan a'teta'; ma kfuun ein, sin pinan ma krahan a'teta' amsa'. Es-es ate nok In masan. Es-es ate nok in pinan ma krahan. Onaim are' saa' ii anmui' kuun in pinan ma krahan, tua.

⁴² Karu amaets ein anmoni nfanin, naan on re' fini fe'e na. Fin karu tsuub amates, in aon amates naan npunu nreu', tua. Mes karu in nmoni nfain, in ka on fa unu' naan. Fin karu in nmoni nfain, in ka bisa nmate ntein fa heen.

⁴³ Oras hit tsuub amates, hit tnaben tak, aof amates naan an'oemeet. Mes karu atoni' naan anmoni nfain, in ro npiin ma nakraah! Fin in nakninu' nrair. Amates ka bisa nmoe' fa saa'-saa' oras ansuub ee. Mes oras in nmoni nfain, in ma'tain besi ntein! ⁴⁴ Karu atoni' nmoin fe', in suma natenab ma nnaebn ahaa, tua. Mes oras in nmaet, he nmoin anfain, Uisneno In Asmaan ee nfee ne 'monit batuur. Ma in ka huma' mese' fa on re' unu'.

⁴⁵ Mansian ahunut re' on re' hit, es re' nai' Adam. Tatuin Uisneno In Suur Akninu', matu'i mnak, "in anjair mansian re' anmoin, re' natenab ma nnaben nahiin." Mes mansian re' In masan on re' nai' Adam, re' a'raat reu'f ii, es re' Kristus. In Asmanan es re' bisa nfee 'monit batuur neu tuaf. ⁴⁶ Ahuunt aan, es re' atoni' re' suma natenab ma nnaben nahiin

✧ **15:45** Reta' Ahun-hunut 2:7

jah, rarit in bisa nmaet. Mes re' anmoni nfain naan, es re' atoni' re' napein 'monit batur na'ko Uisneno In Asmanan. ⁴⁷ Mansian ahunut anbi pah-pinan ia, anmoe' je na'ko auf afa'. Mes re' no nuan ii, es re' Kristus re' neem na'ko neon goe tnanan. ⁴⁸ Hit re' tmoin anbi pah-pinan ia, tahuum on re' mansian ahunut, re' Uisneno nmoe' na'ko auf afa'. Mes tuaf re' nmafut nok Uisneno nbi neon goe tunan, in masan nahuum on re' Kristus re' neem na'ko neon goe tunan. ⁴⁹ Hit arkit oras ia, hit tahuum on re' nai' Adam re' Uisneno nmoe' je na'ko auf afa'. Mes noki-noki te, hit tsenu' ma tseka' masaf fe'u, huma' mese' on re' Kristus re' nkoen On neem na'ko neon goe tunan.

⁵⁰ Aok-bian manekat arki! Re' au he utoon 'eu ki ji, on nai: hit re' atjair mansian masaf amnaa', hit aok ii na'ko naa' ma nuif. Nok ranan naan, hit ka bisa ttoup fa hit pusaak he tjair Uisneno In anah et sonaf neno tunan. Ka bisa fa! Fin tuaf masaf on re' naan, sin aok ein of anpunun nre'un, rarit sin ka bisa ntoup fa rasi re' nabar-baar kuun.

⁵¹ Onaim amneen ma mitniin mirek-reko! Fin au he 'fei 'eu ki rais ma'nifa' es. Of anmui' apirsait bian re' ka nmaten fa. Mes hit arkit of atsenu' ma tseka' masaf fe'u. ⁵² Oras toi's ee in hanan amunit nahaan, are' saa' ii njair nok askeken. Rabah anneis na'ko ho mu'mera'. Fin oras toi's ee nahaan, oras naan amaets ein anmoni nfanin amsa'. Ma karu sin anmoni nfanin jen, sin ka nmate ntein' ein fa heen, ma ka npunu ntein' ein fa goen. On naan msa' nok hit arkit re' amonit. Hit arkit atjair masaf

fe'u. ☆ 53-54 Fin hit aok ii re' bisa npuun oras ia, of na'bani' neu masaf re' ka bisa npuun antein fa! Ma hit arkit re' oras ia bisa tmaet, of na'bani' kit atjair masaf re' ka bisa tmate ntein fa! Naan anjair natuin saa' re' matu'i nain anbi Suur Akninu' mnak,

“Uisneno nare'u nrair rasi 'maten in kuasa,
ma niis naan ee!

Etun hit ka tmate ttein fa.” ☆

55 “Hoe, 'maten!

Ho kuasam et mee?

Hoe, 'maten!

Ho menas et mee?” ☆

56 Nansaa' am es rasi 'maten neik menas neu hit mansian? Naan natuin hit tmo'e tsaan. Es re' naan! Nansaa' am es hit sanat ma penu sin anmu'in kuasa on naan? Naan natuin Uisneno In atoran naruru' ma nakrira' nak, hit sanat ma penu sin antanhai In aprenat. Es re' naan! 57 Mes oras ia, are' saa' ii ok-oke' njarin a'teta'! Rarit hit arkit attoit makasi kou'-ko'u teu Uisneno. Fin In es re' anmoe' kit he bisa tiis taan rais maufinu, tanete tpeo' hit Usi' Yesus Kristus, In a'monin. Ro tebes, Kristus es re' niis batuur, tua!

58 Onaim aok-bian manekat arki! Maran miheer! Kais mi'oni'! Hi mepu meu Uisneno ro he na'baab on reko, ma na'baab on piut. Fin hi mihini mmak, hi maskeet meu hit Usi' naan, ka ruum am parsuum fa, tua.

16

Noni-roit re' tuaf anfee sin he nturun ma nbaab Uisneno lin na

☆ 15:52 1 Tesalonika 4:15-17 ☆ 15:53-54 Nai' Yesaya 25:8 ☆ 15:55 Nai' Hosea 13:14

¹ Oras ia, au he 'tui anmatoom nok roit ein re' hi mibuab sin he mturun Uisneno Iin na anbin kota Yerusalem. Au utoon a'rair apirsait ein et propinsi Galatia, anmoe' on mee m'es na' sin bisa na'bu'a' roit ein naan. Oras ia, hi ro he mmoe' mituin on naan amsa'.[☆] ² Ansuun neno krei, apirsait ein ro he napasib naan sin roit ein a'kre'o na'ko sin meupk ein sin aafk ein. Kais ampao he au 'uum fe'e te, na' hi mmurai m'urus he mi'bu'a' roit. ³ Rarit, karu au 'uum a'tea te, hi miruru' maan kau tuaf re' hi mpirsai je, he neik roit ein naan neu Uisneno Iin na anbin Yerusalem. Rarit au 'tui surat he utoon 'eu sin neu a'naak jemaa't ein et naan. ⁴ Ma karu hi mitenab reko he au 'ok amsa', hai bisa mnao mibu-bua.

Nai' Paulus anroim he nnao neu bare mfaun

⁵ Karu au 'nao 'fuun am uteef a'rari 'bi propinsi Makedonia, na' au 'eit 'eu ki on naan. Mes au he 'nao 'eu Makedonia fe'.[☆] ⁶ Rarit na' au umaik 'ok ki sero 'roo; of oni' 'tea oras mainiikn ii namsoup. Rarit hi bisa mnao maat kau mtea baer jes anteni'. ⁷ Au sairt ii he 'uum 'eu ki ka rabah fa. Fin au he utua 'ok ki sero 'roo, karu natuin Uisneno In romin. ⁸ Mes au he umaika' fe' a'bi kota Efesus re' ia, oras neon ko'u Pantekosta, [es re' Paska oke' te, ankoon neno bo' niim].[☆] ⁹ Natuin anbi bare ia nmui' mainuan re' reko nneis he au bisa 'meup mepu mfaun fe', maski nmui' too mfaun re' anraban Uisneno In mepu.[☆]

[☆] **16:1** Roma 15:25-26 [☆] **16:5** Haef ein sin Reta' 19:21

[☆] **16:8** A'naak Rais Pirsait ein sin Atoran 23:15-21, Surat re' Nareta' Nafani' Raan A'honis 16:9-11 [☆] **16:9** Haef ein sin Reta' 19:8-10

10 Karu nai' Timotius anjair he neem neu ki, amtoup goe nok reko, he in kais anmui' tenab. Fin in re' naan, hit Usi' In ameput, on re' au. ✧ 11 Kais amkonan he tuaf ankana' paar ee. Amturun ma mbaab ee, tar antea in nfain neem nok mamut ma ao-mina', he in bisa nateef nok kau. Fin au 'ok au aok-bian re' bian sin, ampa-pao goe.

12 Anmui' rais jes antein. Au 'furi' 'rair hit aok-bian nai' Apolos, he in neit inkius ki ma aok-bian, bian sin. Mes in ka nroim fa he neit oras ia. Karu in napein mainuan re' reko, na' in neit neu naan.

Ammoe' rais jes amtein

13 Hi ro he mpaant om rek-reko! Hi ro he maran ma mtahan he mpirsai piut meu Uisneno! Kais mimtau! Amha'tain jom! 14 Hi mmoe' saa'-saa' aah ate, mikrira' ma miruru' hi rais manekat.

15 Aok-bian manekat arki! Hi arki mihiin mak, nai' Stefanus nok in uim je nanan, anjarin apirsait ein ahun-hunut neun Kristus anbin propinsi Akaya. Ma sin nmepun nbain-'aetn ok amsa' he ntuthae apirsait ein ok-oke' nbin naan. Onaim au 'toit he ✧ 16 hi mneen ma mitniin tuaf human on re' sin. Es re' tuaf re' anmepu nbain-'aetn on he ntuthae apirsait ein nok tuaf bian sin re' anmepun huma' mese'.

17 Au umnau he 'iit 'aan ki. Rarit, au neek ii nmariin, natuin nai' Stefanus, nai' Fortunatus, ma nai' Akaikus neman esan ia. Nok ranan naan, sin nsenu' ma nseka' ki. 18 Sin nha'tain au nekak, nahuum on re' sin nha'tain hi neekm

ein amsa'. Hi ro he mhormaat meu tuaf ein on re' sin.

Nai' Paulus ansonu' haan tabes ma haan buseet neu tuaf amfaun

¹⁹ Apirsait ein pukan-pukan re' abitan propinsi Asia ansoun ein haan tabes ma haan buseet neu ki. Nai' Akila nok in fee je bi' Priskila,* ma tuaf bian re' nabua nbin sin umi nsoun ein haan tabes ma haan buseet amsa', fin sin anmafuut piut nok hit Usi' msa'.✧

²⁰ Apirsait ein ok-oke' re' abitan ia nsoun ein haan tabes ma haan buseet amsa'.

Karu hi mibua' te, ammatoup es nok es nok manekat akninu' re' arekot neu apirsait ein.

²¹ Amkius miit! Fin au nai' Paulus kau, au 'tui kuuk 'eik au 'niimk aa kuuk on nai: *Saloom!*

²² Sekau ka nmui' fa rais manekat neu hit Usi', Uiseno of anfee hukun neu ne.

Au 'roim he usee tuaf, a'paek uab Aram re' hai atoin Yahudis hai uab 'ak, "*Marana ta!*" In a'moufn ii nak, "Usi"! Amkoen Om uum nai, tua!"

²³ Au 'toit he Nai' Yesus, hit Usi', nakrira' In nekan arekot neu ki.

²⁴ Au 'neek ki ok-oke', natuin hit arkit atmafuut tok Kristus, re' Uiseno nreek Ee neem.

Au 'tu'u 'bi ia goen, tua. *Saloom!*

Na'ko au,
nai' Paulus, kau, tua.

* **16:19** Suur Akninu' uab Yunani nbi era' re' ia, matu'i mnak, "Priska". Priska ma Priskila naan, kanaf mese'. ✧ **16:19** Haef ein sin Reta' 18:2

**Uisneno In Kabin ma Prenat: Rais
Manba'an Fe'u nok Reta' Ahun-hunut
Genesis and the New Testament in the Amarasi
language of Indonesia
Kejadian dan Perjanjian Baru dalam bahasa
Amarasi dari**

copyright © 1999-2014 Unit Bahasa dan Budaya, Kupang NTT,
Indonesia

Language: Amarasi

Translation by: Wycliffe Bible Translators

This translation is made available to you under the terms of the
Creative Commons Attribution-No Derivatives license 4.0.

You may share and redistribute this Bible translation or extracts from
it in any format, provided that:

You include the above copyright and source information.

You do not make any derivative works that change any of the actual
words or punctuation of the Scriptures.

Pictures included with Scriptures and other documents on this site
are licensed just for use with those Scriptures and documents. For
other uses, please contact the respective copyright owners.

2022-03-11

PDF generated using Haiola and XeLaTeX on 21 Sep 2022 from source
files dated 30 Nov 2021

60603d94-9a14-5831-a729-e3ba7b0ebc25